

ASO LUA, 20 IANUARI 2015

Na tauaofia le Fono Aoao Faitulafono i le itula e 9:00 i le taeao e tusa ai ma le Polokalame o Fonotaga a le Palemene 2015.

Na nofoia le Nofoa e le Fofoga Fetalai i le itula e 9:00 i le taeao.

Tatalo.

MALELEGA MAI LE AO O LE MALO

Na fofogaina e le Fofoga Fetalai le Malelega mai Lana Afioga Mamalu, O Le Ao o le Malo.

“TUSI mo:

Le Fofoga Fetalai:

E tusa ai ma le Mataupu 59 o le Faavae o le Malo Tutoatasi o Samoa faapea Tulafono Tumau 95 a le Palemene ua tuuina atu nei le maliega i le Fono Aoao Faitulafono na te iloiloaina ai le Tulafono Tau Faaofi ua faaalua iinei:

1. Tulafono Tau Faaofi o Teuteuga o le Tulafono o le Faaputugatupe mo le Lumanai Manuia o Tagata 2015.

TUUIINA ATU i lou nei Lima i lenei aso 19 o Ianuari i le tausaga 2015.

(Sainia): Tui Atua Tupua Tamasese Efi
O LE AO O LE MALO.”

FOFOGA FETALAI: E manatu o lea ua atoa tagi le paia ma le mamalu o le Maota i lenei taeao fou i le afifio mai ma le tala mai o aao o le paia ma le mamalu o le Palemene i ona tulaga faalupu, i le afifio mai o Afioga i sui usufono mamalu o le Palemene aua o outou lava o sui usufono filifilia o itumalo taitasi o lo tatou atunuu. O le paia lava lea aua Samoa aoao i ona tulaga mamalu ma ona paia sauoo. O le paia aua Aiga ma a latou Tama, o Tama ma o latou Aiga, le Usoga a Pule ma Tumua, Ituaui ma Alataua, Aiga i le Tai ma le Vaa o Fonoti.

Le Afio o lau Afioga i le Taitai o le Malo ma lau Kapeneta, aemaise lau Afioga i le Taitai o le Itu Agai ma sui usufono mamalu uma o le Maota Fono i leni taeao. E ofo alofa atu ma faatalofa atu i ona tulaga aloaia. O lea ua tatou toe potopoto faatasi i le uluai aso leni o a tatou galuega, e momoli atu le agaga faafetai ma le faamalo. Sa tatou vao eseese i nai masina ma nai aso ua tuanai atu ona o a tatou faiga malologa i le faamanatuina o le toe soifua mai o le Pepe Fou aemaise o lo tatou alo atu i le faamanatuina o le aulia mai o leni tausaga fou ua tatou taunuu i ai ma le manuia. Ua faamalo atu le onosai ma le faapalepale i le paia ma le mamalu o lo tatou Maota.

E faapea foi ona faapai atu i le tapuaiga leleoa a Lana Afioga Mamalu, O Le Ao o le Malo ma le Masiofo, le Sui o le Fono a Sui Tofia ma le Masiofo, le paia mauuluga o Samoa i ona tulaga faalupe i le pule mamalu a alii ma faipule, aemaise faletua ma tausi, saaoa ma tamaitai, le loaloa o lo tatou atunuu i malosi o nuu i aumaga o lo o latou faia faiva alofilima aua le anavatau i le tautuaina o lo tatou atunuu i ona vaega eseese.

E faatalofa atu foi i leni taeao i le afifio ma tala mai aao o alii ma tamaitai o Faauluuluga o Matagaluega ma Faalapotopotoga a le Malo ua tatou mafuta i leni aso. E talitonu le faamoemoe o lea ua sagatonu lau o le fō ona ua taatia i lagatonu a tatou polokalame mo leni Aso Fono aua le Tala Faatatau Faaopoopo o Tupe.

TUUNA ATU O PEPA

Na tolaulauina e le Failautusi Pepa nei ua faataatia i luga o le Laulau a Fono e tusa ai ma le T.T.48.

1. P.P.2014/2015 Nu.180, Lipoti Faaletausaga a le Faletupe o le Atinae o Samoa 2014.
2. P.P.2014/2015 Nu.181, Lipoti a le Komisi o le Toefuataiga o Tulafono a Samoa i le Tulafono o Faamasinoga 1961, Lipoti Mulimuli 03/11.
3. P.P.2014/2015 Nu.182, Lipoti a le Komisi o le Toefuataiga o Tulafono a Samoa i le Tulafono o Manaoga Faavae ma le Puipuiga o Tamaiti – Lipoti Mulimuli 11/13.
4. P.P.2014/2015 Nu.183, Lipoti Faaletausaga a le Pulega o Fale ma Malae Taalo a Samoa mo le Tausaga 2012/2013.
5. P.P.2014/2015 Nu.184, Tali a le Malo i le P.P.2013/2014 Nu.127, Lipoti a le Komiti o Tupe Maua ma Tupe Totogi i le P.P.2012/2013 Nu.38, P.P.2012/2013 Nu.39 & P.P.2012/2013 Nu.40, Faamatalaga o Tupe a le Malo mo Tausaga Faaletupe Faaiuina aso 30 Iuni 2008, 30 Iuni 2009 & 30 Iuni 2010.
6. P.P.2014/2015 Nu.185, Tali atu a le Malo i le P.P.2013/2014 Nu.56, Lipoti a le Komiti mo Ofisa o le Palemene i le P.P.2013/2014 Nu.12, Lipoti a le Pule ma Suetusi Sili i le Fono Aoaofaitulafono mo le Tausaga Faaletupe faaiuina aso 30 Iuni 2010 ma le 30 Iuni 2011.

TUUNA ATU O LIPOTI A KOMITI FILIFILIA

Na tolaulauina e le Failautusi Lipoti a Komiti Filifilia nei ua faataatia i luga o le Laulau a Fono e tusa ai ma le T.T.51.

1. P.P.2014/2015 Nu.186, Lipoti a le Komiti o Mataupu tau Faamasinoga, Leoleo & Falepuipui ma Faamasinoga o Fanua & Suafa i le P.P.2014/2015 Nu.92, Lipoti Faaletausaga a le Komisi o le Toefuataiga o Tulafono a Samoa mo le Tausaga Faaletupe 2012/2013.
2. P.P.2014/2015 Nu.187, Lipoti a le Komiti o Mataupu tau Faamasinoga, Leoleo & Falepuipui ma Faamasinoga o Fanua & Suafa i le P.P.2014/2015 Nu.123, Lipoti Faaletausaga a le Matagaluega o Faamasinoga ma le Faafoeina o Tulaga tau Faamasinoga mo le Tausaga Faaletupe 2012/2013.
3. P.P.2014/2015 Nu.188, Lipoti a le Komiti o Mataupu tau Faamasinoga, Leoleo & Falepuipui ma Faamasinoga o Fanua & Suafa i le P.P.2014/2015 Nu.11, Lipoti Faaletausaga a le Matagaluega o Faamasinoga ma le Faafoeina o Tulaga tau Faamasinoga mo le tausaga Faaletupe 2011/2012.
4. P.P.2014/2015 Nu.189, Lipoti a le Komiti o Tupe Maua ma Tupe Totogi i le Tala Faatatau Faaopopo Muamua o Tupe Maua ma Tupe Totogi a le Malo o Samoa mo le tausaga faaiiina aso 30 Iuni 2014.

LAFO A LE KOMITI O GALUEGA, TULAFONO TUMAU, MAOTA FONON MA MATAUPU TAU FAIGA PALOTA

FOFOGA FETALAI: Tulai mai le Afioga i le Sui Taitaifono o le Komiti.

Tofa AGAFILI PATISELA ETEUATI TOLOVAA (Sui Taitaifono, Komiti o Galuega, Tulafono Tumau, Maota Fono ma Mataupu tau Faiga Palota): Lau Afioga i le Fofoga Fetalai, ae ou te le i faatuina le lafo e muamua ona ou faafetai atu i le talosaga molimoli i leni taeao, e faafetaia ma sula ai le alofa ma le agalelei o le Atua i Lana puipuiga ma Lana taitaiga i le soifua ma so matou ola ua tatou aulia mai ai le uluai Fono o leni tausaga. E faatalofa aloaia atu foi i lau Afioga i le Fofoga Fetalai, faapea foi le Taitai o le Malo ma le Aiga Kapeneta, le Taitai o le Itu Agai faapea sui usufono mamalu o le Fono Aoao Faitulafono a Samoa.

E faatalofa atu foi i le Ofisa o le Fono faapea Faauluuluga o Matagaluega ma le mamalu o Samoa ua potopoto i leni taeao. E faatalofa aloaia atu foi i le faafogaafoga tapuai a Lana Afioga Mamalu O Le Ao o le Malo ma lau Masiofo, seia oo lava i se toe tagata o faafogaafoga mai i le Fonotaga i leni taeao. Ua malo le pale; ua malo le folau.

Lau Afioga i le Fofoga Fetalai ua ou tulai atu e faatu le lafo, *Ina ia faamaonia e leni Fono Aoao le Polokalame o Fonotaga mo le Tauaofiaga o le 2015/2016 ua tuuina atu i nei e pei ona faamaonia e le Komiti o Galuega, Tulafono Tumau, Maota Fono ma Mataupu tau Faiga Palota.*

<i>Masina</i>	<i>Aso</i>	<i>Masina</i>	<i>Aso</i>	<i>Masina</i>	<i>Aso</i>
<i>Ianuari</i>	<i>20</i>	<i>Me</i>	<i>26</i>	<i>Novema</i>	<i>17</i>
<i>Fepuari</i>	<i>17</i>	<i>Iuni</i>	<i>9</i>	<i>Tesema</i>	<i>15</i>
<i>Mati</i>	<i>17</i>	<i>Aukuso</i>	<i>18</i>	<i>Ianuari 2016</i>	<i>19</i>
<i>Aperila</i>	<i>21</i>	<i>Oketopa</i>	<i>20</i>		

Ma lou faaaloalo lava.

E le i faaluaina le lafo.

Na faamaonia le lafo ma faamaonia ai le Polokalame o Fonotaga a le Fono Aoaio mo le Tauaofiaga o le 2015/2016.

**TULAFONO TAU FAAOFI O LE FAATATAUINA O TUPE
FAAOPOOPO (NU.1) 2014/2015 – felafolafoaiga i luga o le
faitauga faalua**

FOFOGA FETALAI: E tusa ai ma Tulafono Tumau o le a faagasolo nei loa felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2014/2015.

O le avanoa leni o sui usufono e saunoa ai i tulaga tau tupe ma le tamaoiga o Samoa faapea faiga faavae tau tupe a le Malo.

Ou te avatu foi fautuaga i sui usufono, e le tautalagia i le taimi nei mea taitasi o le Tulafono Tau Faaofi. Ua maea ona outou tulei saunoa i le Tala Autu o Tupe, e fautuaina faatoa saunoa i mea taitasi o le Tulafono Tau Faaofi i le taimi o le iloiloga auiliili pe a maea felafolafoaiga i luga o le faitauga faalua, ae agai pea saunoaga i tulaga lautele o le talanoaina o le Tulafono Tau Faaofi ina ia malamalama ma atoatoa e pei ona tuuina mai ai le Tulafono Tau Faaofi i luma o le Laulau a Fono i le masina ua tuana'i atu.

O le avanoa leni mo se sui usufono muamua e fia saunoa. E 30 minute avanoa, a o le a lafo atu i le paia ma le mamalu o le Maota Fono mo se sui usufono e amataina leni taeao fou.

Tulai mai le sui usufono mo Faasaleleaga Nu.2, Susuga Papalii Lio Faavaivaiomanu Taeu Masipau.

Susuga PAPALII LIO FAAVAIVAIOMANU TAEU MASIPAU (Faasaleleaga Nu.2): Faafetai lava i lau Afioga i le Fofoga Fetalai mo le avanoa ma e faafetai foi i le paia o le Maota. E talitonu e auai faatasi foi leni usugafono i le viiga ma le faafetai e pei ona siitia e lau Afioga i le Fofoga Fetalai i leni taeao fou, aua le agalelei o le Atua i le taitai manuia mai o le Palemene o Samoa i leni tausaga fou aua le toe faaauauina o ana galuega. E momoli atu foi le faafetai i lau Afioga i le Fofoga Fetalai aua le taitaiga o le Maota i na tausaga ua tuana'i atu seia oo mai i leni taeao. Ua malo faafetai ua faamalo le galulue, e faafetai foi mo le taitaiga o lo tatou Maota.

E faafetai foi i le Palemia ma le mamalu o le Kapeneta mo galuega faatino a lo tatou Malo. E momoli atu le agaga faafetai ona ua tatou aulia mai le toe amatalia o lenei tausaga fou aua Fonotaga a le Palemene; ua faamalo le galulue. Ua faafetai i lau Afioga i le Palemia ma le Kapeneta mo galuega aua le atiaeina o lo tatou atunuu.

E fia momoli foi le faafetai i le Taitai o lenei Vaega Faaupufai ma lenei foi Itu. O fautuaga foi e avatu i lau Afioga i le Palemia ma le Kapeneta, e talitonu lava o lo o i ai ni o matou sao po o ni sao o le Vaega e Agaia le Malo aua le atiaeina o lo tatou atunuu.

E fia momoli foi le agaga faafetai i le Failautusi ma le aufaigaluega a le Fono Aoa mo galuega aua lo tatou Maota.

E faafetai foi i Faauluuluga o Matagaluega aua o le poutu o lo tatou Malo ma le atunuu, ua faamalo le galulue.

E faatulou atu foi i le tapuaiga a le Atunuu i Lana Afioga Mamalu O Le Ao o le Malo ma le Masiofo, le Sui o le Fono a Sui Tofia faapea foi le Masiofo, lau Afioga i le Faamasino Sili ma le mamalu i le Faamasinoga. O le maave eseese o le atunuu mai mauga tetele seia oo i mauga iti. E talitonu lava pe oo i ai se leo pe e le oo i ai, e talitonu lava e le aveesea ai outou paia ma outou sa ma outou mamalu aua e tumau lava e oo i le faavavau.

E faafetai foi i Taitai o Ekalesia ma nofo a faafeagaiga i totonu o le atunuu i a outou tatalo leleoa ma faanono-manu, aua se manuia o le atunuu. Ua faamalo faafetai mo a outou galuega.

E le faagaloina foi si ou itumalo Faasaleleaga Nu.2, le Afio o Leilua ma le Toalima, Sa-Alaalatoa ma Alo o Malietoa, Tuilagi ma Namulauulu faapea foi Le na Aimalae, le Faletufuga ma upu ia te oe Safotulafai. Ua faamalo le tapuai; o lea ua toe amatalia galuega o lenei tausaga i le manuia. O le mea lea e faamalo atu ai faafetai le tapuai.

Lo'u nuu o Sapapalii i le Susu o le Malietoa i lou tala-na-atoa, o lou fala folaloe e faafofoga ia te oe Samoa. Susu foi Aiga Sa-Malietoa, le alaalafaga o Usoalii faapea foi Mago ma Luasiufanua. O le nofo a Faafeagaiga i totonu o lo tatou itumalo, faafetai, ua faamalo le tapuai. Ua faafetai tatalo, ua manuia mea uma o lo o feagai ai ma lenei usugafono ona o la outou tatalo ma la outou tapuaiga.

O se manatu i le Tala Faatatau Faaopoopo (Nu.1) o le Tupe lau Afioga i le Fofoga Fetalai, ua malo faafetai i lau Afioga i le Minisita po o le Afioga i le Palemia i le faatulai mai o le Tala Faatatau Faaopoopo o le Tupe. O lea e matau atu e \$10+ miliona le aofaiga o le Tala Faatatau Faaopoopo o le Tupe mo le vaega o totoe o lenei tausaga. Ua malo faafetai le galulue, ua faafetai foi i le Matagaluega o Tupe ma i latou uma na galulue aua le tapenaina o le Tala Faatatau Faaopoopo o le Tupe mo lenei vaega amata o le tausaga 2015.

I lau matau i ai i le Tala Faatatau o le Tupe, o lo o i ai se vaegatupe e \$2.58miliona, peiseai o le tupe lea e matau atu o lea e faatupe ai le tatou Tala Faaopoopo o le Tupe totoe mai i le Fonotaga lea o le SIDS. E faafetai, faafetai o lea e maua o lea ua totoe lea vaegatupe tele, o lea foi ua fesoasoani mai i le tatou Tala Faaopoopo o le Tupe. Ae e i ai lava sina vaega lea ua maua foi i sau sailiiliga, e talitonu lava o lenei tupe na pasia aloaia i totonu o le Palemene mo le faatinoina o galuega uma lava tau le SIDS, ae ua matauina o lea ua faamalieina uma lava ia le tele o Matagaluega ma ua i ai uma foi vaega uma ua tuuina i ai, a o lo o matauina, o le Matagaluega lea o Leoleo, ua maua sa i ai le latou talosaga na tuuina atu aua o latou alauni i aso ia e 16 sa

galulue ai le Matagaluega o Leoleo. E le tau avatua foi i luma o le Palemene lea tulaga, a o se agaga e lagona ai foi le alofa, o lea ua matau atu ua toe faafoi lenei seleni tele a o lea e matau atu, e le i totogiina ia alauni o le Matagaluega o Leoleo i aso ia e 16 sa galulue ai.....

Susuga Hon Tuilaepa Fatialofa Lupesoliai Aiono Neioti Sailele Malielegaoi (Palemia): Lau Afioga i le Fofoga Fetalai o se mea e fia faasao.

FOFOGA FETALAI: Malie le sui usufono, se i tulai atu le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Ua uma ona totogi alauni ia. O le mafuaaga na tuai ai, e i ai vaega sa fesiligia e le Matagaluega o Tupe, ia ae avatu i le leoleo o ia lea i le ofisa lea e nafa ma le faamalamalama o mataupu ia sa fia malamalama ai le Matagaluega o Tupe, e tolu lelei lava masina o la e nofonofa ai lava e le i talia maia. O le tulaga lena o lea foi sa oo mai ia te au ma ou faatonuina ai e vave tali mea ia na avatu e le Ofisa o Tupe fesili leaga o fesili e taua. E ala ona ave fesili na, ona e i ai le tulaga taua o le Matagaluega o Tupe i le puipuiga o tupe a le Malo. O le tulaga lea ua uma, e leai se mea e te popole ai, ua uma ona totogi.

FOFOGA FETALAI: Ia o lea ua tuu atu le faamalamalama lau Afioga i le sui usufono mamalu. Tulai mai e faaauau le saunoaga.

Susuga PAPALII LIO FAAVAIVAIOMANU TAEU MASIPAU: Ia ne i te i ua ma fetalai ma le Afioga i le Palemia, leai o lea ua uma ona totogi ia leoleo foi ia e le o ni leoleo tumau, a o leoleo o la e tumau i le taimi nei, ia ou te talitonu ailoga o maua e lau Afioga, e le i totogiina i le taimi lenei, mo le silafia e lau Afioga i le Palemia.

FOFOGA FETALAI: Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, ua uma foi ona ou mauaina le faaaliga i le tulaga lena, o le pau o le Matagaluega. O lea foi la ua ave le mataupu i totonu o le Kapeneta e tapa ai le Matagaluega o Tupe e totogi tupe ia ma le auala e fai ai, e i ai le mea lea e tupu e tele lava ina faitioina le Malo i mea faapenei, e i ai ia faauluuluga e le o tilotilo lelei ma malamalama lelei i mea o faatonuga, a o faatonuga ia a le Kapeneta ua uma ona fai, na fai i le tausaga le la, e faatino mea ia o alauni o leoleo ia siitaga o leoleo ia e te taua, e le toatele ni leoleo, o lea e tau maua atu pe na o le toafa ea leoleo e aafia i le mea lea. O lea la ua uma ona fai i ai le faatonuga e faatino le Iuga a le Kapeneta ua leva ona avatu. Na ala ona ou iloa, ona ua apili sao mai lava ia leoleo ia te au, o le ala lena na ou iloa ai.

FOFOGA FETALAI: E manatu ua malamalama lau Afioga i le sui usufono mamalu, e manatu ua malamalama le tulaga i lou atugaluga i totogi o leoleo o lea ua maua o la ua fai.

Susuga PAPALII LIO FAAVAIVAIOMANU TAEU MASIPAU: Lau Afioga i le Fofoga Fetalai faafetai o lea ua maua, e le o silafia e le Palemia le mea lea e tulai mai i le vaega tonu lava lea.

FOFOGA FETALAI: Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, o lea ou te talanoa atu i mea tusitusia, a o mea na e te sau ai o mea faalogo. Se o le mea lena e leaga ai tatou, o le faalogo loa i le tala, oso, o lea ou te talanoa i mea tusitusia ua uma ona aumai i luma o le Kapeneta ma ua uma ona fai i ai le Iuga a le Kapeneta ae le i faagaioia lava. O le tusi la a latou ia na aumai, se faamolemole Tuilaepa ua matou sulu atu ia te oe ua leai se isi matou te agai i ai. Ona ou avea lea i le Tribunal se i siaki mea ia, ae aumai le latou tali, e sao leoleo ia. O le Iuga a le Kapeneta ua uma ona fai ae le i faatinoina.

Lau Afioga i le Fofoga Fetalai, o lea ou te talanoa atu i mea tusitusia ua oo mai i le Kapeneta ma au nei. Ae o le mea lea e leaga ai outou, tou te o i tua faalogologo, faitatala. Ua iloa le mea o le faalogo tala, o lea foi e lavea ai le Taitai o le Itu Agai, o le pa oso, pa oso.

Afioga Hon Palusalua Faapo II (Taitai o le Itu Agai): Lau Afioga i le Fofoga Fetalai.....

FOFOGA FETALAI: Se malie ia le Taitai o le Itu Agai, o lea foi o le a amata le taeao.....

Afioga Hon Palusalua Faapo II: Leai ona ua taua au, lau Afioga, ma le faaaloalo lava.

FOFOGA FETALAI: E le o ni tau fou, ua leva ona tau lou suafa mamalu i taimi uma.

Afioga Hon Palusalua Faapo II: Leai o le mea lea e taumafai atu ai lenei itu, e omai leoleo ia matou pe a le faia e lau Afioga.

FOFOGA FETALAI: Ia.

Afioga Hon Palusalua Faapo II: O leoleo ia na galulue i uta i le SIDS lea e fai atu ai. E le i faia se totogi.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, o le mea e fia faasao. O ai la leoleo ia na o atu? O ai la leoleo ia na o atu?

FOFOGA FETALAI: Se malie Palusalua.

Afioga Hon Palusalua Faapo II: Se ou te musu e tau atu ne i e tulia. Ioe.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Afai e o atu ia outou, ia o ane i ai ia Palu, o le a le latou mea e maua atu ia Palu?

Afioga Hon Palusalue Faapo II: O alauni ia e talanoa atu ai, ae le o le siitaga o totogi.

FOFOGA FETALAI: Malie le Taitai o le Itu Agai.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, leai leaga e taua mea ia, aua le aumaia tala pepelo i totonu o le Maota, aua le....vaai le....e oo foi i le Tulafono lea.....

Afioga Hon Palusalue Faapo II: E le o ni tala pepelo lau Afioga, o ovataimi o leoleo, o ovataimi o leoleo lea ou te talanoa atu ai.

FOFOGA FETALAI: Malie le Taitai o le Itu Agai.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Palu, na o le pau lava le mea lea e faavae ai au faaiuga o le faalogologo tala, faalogologo tala, tuu le mea lena o le faitatala, aua e le maua ai se mea amiotonu.

FOFOGA FETALAI: Malie le sui usufono mamalu, o lea ua maua le mataupu....

Afioga Hon Palusalue Faapo II: O le mea lea e fia faasao atu lau Afioga, e le o totogi o leoleo o ovataimi o leoleo lea ou te fai atu ai, o ovataimi o le galuega lea na fai i uta i le SIDS.

FOFOGA FETALAI: Le Taitai o le Itu Agai, e fautuaina le sui usufono mamalu e see ese ma totogi o lea ua malamalama ua uma ona totogi leoleo, agai lau saunoaga i isi mataupu o le tatou Tala o le Tupe le sui usufono mo Faasaleleaga Nu. 2.

Susuga PAPALII LIO FAAVAIVAIOMANU TAEU MASIPAU: Ua lelei faafetai, o le mea sili ona taua, ou te iloa o lea o le a fai, aua o le mea moni lava ia, o lo o.....

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, se o le mea lava lea e fia faasao. E na o le toafa lava leoleo ia e le o ni mea e faasino i le SIDS, a o le tulaga lava ia i le SIDS, ua uma, lea na ou tau atua, e fai totogi ia e le i faia le Lotu Tamaiti. O e manatua le Lotu Tamaiti? O Oketopa i le Aso Sa lona lua, e fai la e le i faia le Lotu Tamaiti. Ia se i vaai ua leva ona uma. Oketopa, Novema, Tesema, Ianuari, se talanoa i ni mea fou.

FOFOGA FETALAI: Ia tulai mai le sui usufono mamalu. See ese ae faaauau le saunoaga i nisi mea o lea ua manino le mataupu na i ai le atugaluga.

Susuga PAPANII LIO FAAVAIVAIOMANU TAEU MASIPAU: Ia lelei lau Afioga i le Fofoga Fetalai, o le a ou see ese ae ou te le i malie. O lea e faafofoga mai le Afioga i le Minisita e \$75 le alauni o leoleo uma lava na galulue i le SIDS i le aso, o lea e le i totogia. O lau tala lea i luma o le Palemene.....

FOFOGA FETALAI: Malie o lea ua taatia i le agatonu le.....

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, ua uma ona totogi ia latou o leoleo ia. E manatua foi, sa fai feutanaiga ma faatulaga ai totogi o latou. E i ai la fesili sa manaomia e le Matagaluega o Tupe i mea tonu lava ia sa talanoa ai. Se o le mea lea ou te fai atu, a avatu mea o lea e fai e le Malo, ona gauai mai lea, ae le o le finau, finau, finau. Ae lelei ona e toe alu e aumai leoleo na e tau sao ane ia te oe ia ma ave i le ofisa, o le a o atu ia te oe e le maua ai se sao? E te le o toe komesina. Ae a oo atu ia te oe, o oe o le sui usufono o le Malo, e te avea i ai le tala sao. Ia se i vaai ua leva la ona tau atu ia oe ae sa tatau ona e afio e te talanoa i le Minisita? O le mea lena aupito amiotonu. A o lou nofonofa faatoa aumai iinei a o lea ua leva ona uma ona fofo, se tatou talanoa i ni mea fou, ae soia le lau maia mea o otaota.

FOFOGA FETALAI: Ia tulai mai le sui usufono mamalu.

Susuga PAPANII LIO FAAVAIVAIOMANU TAEU MASIPAU: Ua lelei, faafetai o lea ua maua, e talitonu lava o lea ua aoga foi le laga o lenei mataupu, atonu o lea ua faafofoga mai foi lau Afioga i le Minisita, e faamalulu atu i lau Afioga i le Minisita, e leai, e le o agai i lau Afioga po o le Kapeneta, e i ai le vaiiliu lea e mafua ai, ia ae lelei o lea ua faafofoga mai le Matagaluega, o lea foi ua faafofoga mai lau Afioga i le Minisita, masalo na oo atu i lau Afioga le tusi a le Matagaluega ma tulaga ina ia faamanatu atu ai le vaega lea, ae o le agaga lena o lea ua avatu ona ua toe faafoi lenei seleni tele ae le faauma ai ia mea, ae ui i lea, faafetai i lau Afioga i le Fofoga Fetalai.

Ona ou see mai ai lea i le Matagaluega o Tupe tusa foi o le seleni fuafuaina. Ia faafetai o lea e matau atu, o lo o i ai foi le vaegatupe mo le tatou malae vaalele. e talitonu, o le malae vaalele lava ia e tatau ona faaleleia, leaga o i e toai i ai ia tatou malo ma atunuu mai fafo. A o le fesili lava ia a lou sui usufono, leaga o le tasi lea Faalapotopotoga tau Fefaatauaiga a le Malo po o le Public Trading Bodies. O le a se taimi e i ai se sao o le tatou malae vaalele i le tatou Tala Faatatau o le Tupe ma fesoasoani i le tatou Tala o le Tupe? Ia o lau lea fesili. O lou lava sui usufono, leai e talitonu foi a o faafofoga foi le Pulega, o le agaga lava ia pei ona faatulai ai a tatou Faalapotopotoga tau Fefaatauaiga a le Malo, o le fesoasoani. Ia a o le fesili lena, o le a se taimi ma se ituaso e maua ai se fesoasoani ma se sao i totonu o tatou tupe aua le faatupeina o tatou atinae?

Ona ou oo mai lea i le Tupe Faatatau i lalo lava o le Matagaluega o Tupe. O lo o maua o lo o i ai se vaegatupe mo le faatupeina o ofisa o Minisita Lagolago e toalua. O lea e matau atu, o le fesili lava a lou sui usufono, pe o ni Minisita Lagolago fou pe o Minisita lava ia sa i ai ae ua toe fesui? A o le fesili, e faapefea ona faatupe a latou ofisa sa i ai muamua, a o lea ua toe aumai i le Tala o le Tupe, e peiseai o ni Minisita Lagolago fou, ae leai o Minisita Lagolago o tatou lava nei na omai i le Paeaiga o lea lava tatou te i ai? Pei o le agaga lena o lau tilotilo ma lau vaai, pe aisea ua faatupe ai ia ofisa fou a Minisita Lagolago fou ia?

Ona ou oo mai lea i le Matagaluega o le Punaoa Faanatura ma le Siosiomaga.....

FOFOGA FETALAI: Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, ia ou te ofo i lea mea, o le matua faigofie lava. A sui loa Minisita, ona sui mai lea e nofonofu i tafatafa o lana ia lava Minisita, ae le faapea e sui Minisita i lalo o le isi Minisita ae saga nofonofu lava i o i tafatafa o le Minisita tuai, vaai o le faigofie ia. A o a la potu e avanoa, ia e faaaoga, e le faapea o le a le faaaoga, ae sau lava e nofonofu i tafatafa o le Minisita fou, e talatalanoa aemaise le tele o mau galuega o lo o fai i mea e tou te fai mai ai e fai, vaai o le faigofie ia.

Afioga Hon Palusalua Faapo II: Lau Afioga i le Fofoga Fetalai o se mea e fia faamalamalama.

FOFOGA FETALAI: Ia se i tulai mai le Taitai o le Itu Agai.

Afioga Hon Palusalua Faapo II: E sao lelei lava le fesili lea, e \$700,000 na fai ai le Ofisa o le NPF mo Minisita Lagolago ia, e \$700,000 na alu ai i le faiga o Ofisa o Minisita Lagolago nei.

FOFOGA FETALAI: Malie le Taitai o le Itu Agai.

Susuga Hon Tuilaepa Fatialofa Lupesoliai Aiono Neioti Sailele Malielegaoi: O le mea e fia faasao. E le \$700,000 ia le tupe, ia vaai i ai, se aua e te potu e faatele, aua e te potu e faatele, ua leva ona pisa ma outou pisa ma tau mai le aofai o le seleni. E laitiiti lava le seleni i lena numera na e aumaia?

FOFOGA FETALAI: Tulai mai le sui usufono mo Faasaleleaga Nu. 2.

Susuga PAPALII LIO FAAVAIIVAIOMANU TAEU MASIPAU: Ona ou see mai lea, faafetai o lea ua tali mai le Afioga i le Palemia.

Ona ou oo mai lea i le Matagaluega o Punaoa Faanatura ma le Siosiomaga, ia o lea e matau atu o lea ua i ai le seleni mo le faatupeina o taligalu. Ia e leai, lau Afioga i le Minisita o au le isi sui usufono lea sa avatu foi le talosaga, ua pei ua ou tau mafanafana.

FOFOGA FETALAI: Tulai mai le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, ua uma ona fai lau faatonuga, e le o talanoaina le Tala o le Tupe, a o lea lava e auiliili mai lava e le sui usufono le Tala o le Tupe, o lea lava e faasolosolo i luga o le Tala o le Tupe, e le o talanoaina faatoa auiliili pe a oo ina see tatou i le tulaga faa-Komiti.

FOFOGA FETALAI: Malie le sui usufono mamalu, o lena ua e faafofoga mai, agai pea i le tulaga lautele ae aua nei auiliilia mai pei ona ou fai atu i le taimi muamua. Tulai mai le sui usufono mamalu.

Susuga PAPALII LIO FAAVAIVAIONANU TAEU MASIPAU: Lau Afioga i le Fofoga Fetalai, o le ala foi lena o lou taua, ona o le talosaga a lenei itumalo o le lauga faalauaitete, e le o faapitoa. E moni lava la e faapitoa i le taligalu, ae e leaga o le lauga faalauaitete sa taua i lau lauga i totonu o le Palemene lenei. A o lau fesili, se pei ua tau masalomia foi lau faasoa lau Afioga i le Minisita. E i ai le isi toeaina Faasaleleaga Nu.1, fai fai lava le faasoa, ua alu lava ua atoa uma lava, toe lava o ia, faapea loa le tala a le toeaina, “Oi, ua le lavea foi le fanau a Soanai.” E faapena uma lava le mea lea ua ou vaai atu i ai i le faasoa a le Minisita.

FOFOGA FETALAI: Se finagalo malie le sui usufono mamalu, se i tuu atu le avanoa leaga o lea ua tuuaia le Afioga i le Minisita e ana le faasoa. Tulai mai lau Afioga i le Minisita.

Tofa Hon Faamoetauloga Lealaiauloto Ulaitino Faale Tumaalii (Minisita mo Punaoa Faanatura ma le Siosiomaga): Faafetai lava i lau Afioga i le Fofoga Fetalai mo le avanoa. E leai o le tupe lea e taua i i, o le tupe lea i tulaga foi lea o recoveries ethics, o le faaleleia atili. E ese vaega na e te saunoa i ai o lea e lavea ai taligalu o itumalo eseese.

O le faamalamalamaga lena o le vaega lea.

Susuga PAPALII LIO FAAVAIVAIONANU TAEU MASIPAU: Malo, ia se i vaai la i le manaia, ua aoga foi lau fesili o lea ua malamalama ai lea vaega. Faafetai i lau Afioga i le Minisita, a o lena ua avatu se agaga o lenei itumalo e pei ona avatu le talosaga i lau Afioga, sei e alofagia lenei itumalo leaga e fai si latalata mai o le aau i le gataifale o lenei itumalo faamolemole.

Ona ou oo mai lea, e i ai le vaega foi lea e taua ai o mea o vaegatupe faapitoa mo i tatou foi nei, o lea e sau i i o faa-tekinisia o fanua, po o technical services. Ia te au lava ia, ou te iloa lava o fanua, o mataupu taua foi pei ona ou laga ma ou avatu i luma o le Palemene, ona o le Matagaluga a le Minisita lea e resitala ai o tatou fanua umia saoloto ma fanua foi ua lisi, fanua faaleaganuu. E i ai lava nai faafitauli a nisi foi o le mamalu o le Atunuu, aemaise lava, e faamalulu atu i le afioaga o Salelologa, o le tele ia o nai tagata foi e fesootai atu, aemaise lava fanua foi nei faasoa a afioaga, o le faasoa patino lava lea i le Suafa, lona fanua. Ona i ai lea o le talitonuga o lena Suafa, o lau lava meatotino, ona fai loa lea o fesootaiga ma i latou foi nei aemaise lava le aufaipisinisi, ua mananao i fanua nei e fai ai a latou pisinisi, ua mananao foi e faatau motu, ae o le faalavelave, o la e puipuia i le tatou Faavae o tatou fanua faaleaganuu, e le faatagaina ona faatau. Ae o sau fautuaga i le Malo, pe le i alagatatau ona fai se isi tatou Tulafono fai se vaega

foi lenei o fanua faaleaganuu, po o se category form o fanua faaleaganuu, pei la o ituaiiga mea faapea, o fanua o lea ua tuu atu mo le tagata lea i le taimi lenei. E tatau foi, o lo o naunau foi lea tagata ina ia maua se seleni e atiae ai lona aiga, a o se avanoa foi lea e tuu atu i le aufaipisinisi e fai ai sana pisinisi. E pei o lau fautuaga mo le agai atu i le lumanai.

FOFOGA FETALAI: Se i onosai mai le sui usufono se i tuu atu le avanoa i le Afioga i le Minisita.

Tofa Hon Faamoetauloga Lealaiauloto Ulaitino Faale Tumaalii: Faafetai lava i lau Afioga i le Fofoga Fetalai mo le avanoa. O le vaega tonu lava lea ua saunoa i ai le Tofi, o lea e i lalo o le vaega foi lea o fanua faaleaganuu foi lea e lisi atu i tua i le tulaga foi lea o mea tau pisinisi ina ia faaoga fanua ia e le o faaogaina. O le tulaga lea pei lava foi ona moni ai le saunoaga, e le o mafai ona faatau motu fanua faaleaganuu. O le tulaga lena o lo o i ai i totonu o le Vaega 102 o le Faavae pei ona e saunoa i ai. A o le tulaga tonu lava lena, o lea e i ai le avanoa lena e lisi ai fanua na faaleaganuu, i le tulaga foi lea e fai ai pisinisi. Ae a faapea e le mananao e o lo o i ai fanua ia e lisi, e leai lava se tulaga e afaina ai latou ia. Ma le faaaloalo lava.

FOFOGA FETALAI: Malo faafetai. Tulai mai le sui usufono mamalu e faaauu mai le saunoaga.

Susuga PAPALII LIO FAAVAIIVAIOMANU TAEU MASIPAU: Malo faafetai. Na o se fautuaga mo le tatou agai i luma. O lea ou te malamalama i le taimi lenei i le Tulafono, e le o mafai, ae ona e i ai nai o tatou tagata e o atu foi e fia maua se fesoasoani i se fautuaga tulaga faaletulafono, o le ala foi lea ua mafua ai ona ou laga, ona e le faatasi pe faalua, ae ua faatele ona o atu nai tagata. Masalo o lea foi e faafofoga mai nisi i fanua fou nei e i Salelologa e i ai se vaega lea na faatau mai e le tatou Malo. E pei o le vaega tonu lena, a o se fautuaga mo le agai i luma.

Mo se faataitaiga foi, a faapea o le a se finagalo o le Malo i se taimi o le a faamatuu mai fanua i afioga mo se faataitaiga pe a faapea e faatino mai lena tulaga. O se avanoa foi lena e vaevae ai i aiga ma nuu, pe le o i ai se alagata e fai ai se isi vaega lea ina ia faatino ai loa le faatau motu. O tulaga faapena, a o lea ua ou malamalama lau Afioga i le Minisita i le Tulafono o lo o i ai i le taimi lenei, ae o se fautuaga mo le agai i luma, ae o lea pei ona silafia pei ona i ai le pule faamau i le Tulafono lea ua i iai le taimi lenei, ua le toe faia, pei o le mea lea sa faatino ai i taimi ia. Ou te talitonu foi ua talafeagai le aveese o lea tulaga ona o le fuafuaga lava foi lea faamatai ma lana fanua e agai i ai, ae ou te iloa, ua talafeagai le aveese... Ae o se Tulafono ina ia aveese ai se vaega, o se vaega o fanua faaleaganuu ae le taua lava fanua ia na soifua ma ola mai ai aiga, o fanua lava na e tatau ona faatumauina pea, aua lava le suia. A o nai vaega fou ia pei ona ou faamanino atu ina ia silasila i ai le tatou Malo mo le agai i luma maua i ai se fesoasoani mo le agai i luma tagata e ana fanua, a o le aufaipisinisi o fia o atu e sasaa atu tupe i aiga ma nuu e faaoga i ai vaega ia fanua pei ona ou taua.

Ona ou oo mai lea i le Matagaluga o Faamasinoga, ia o le lauga faalauaitale lava lau Afioga i le Fofoga Fetalai, i mea ia o lea ou te vaai i ai, e i ai foi mea i le tausiga o tama, ua uma foi le tausiga o tina ma tamaiti, a o lea

foi ua i ai ma le tausiga o tama latou ia. O lona uiga o le agaga o lau tala, a tausi se tama, o lona ia lava faatamala o le a faaletonu ai ia, a o le agaga ia o le seleni, se ana aumai lena seleni se i fai ai le matou fale faamasino lea i Tuasivi, o lea e afio mai le Afioga i le Minisita, le fale faamasino faaitumalo i Tuasivi leaga o le fale faamasino lea o lea e i totonu o lou itumalo, ou te maua soo lava le le lava o le fale faamasino lea, a o le toatele o nai tagata o le matou motu i Savaii, e tele ina i fafo o le fale faamasino. O le fale faamasino foi lea e ea malulu, ae tele ina misimisi luva foi nei o la e sao le ea i fafo. E pei o le mea lea e talosaga atu ai, se i e alofa, leaga o lea e le o afio mai le Minisita o Faamasinoga, se i silasila ane i le matou Fale Faamsino Faaitumalo i Tuasivi faamolemole.

Ona ou oo mai ai lea i le Pulega i le Laueleele, tasi lenei Pulega e momoli atu ai le faafetai, ua ou matauina ma ou maua, tasi lenei Pulega o lea e i ai lo latou sao i le Tala o le Tupe. O se fiafiaga foi lea i lou nei sui usufono ona o le lelei pulea, aemaise o lea e fesoasoani mai i le tatou tupe. O le matua lagolagoina lava o lenei seleni, aemaise lava Pulega faapea o lea e fesoasoani mai, o lea e fai lona tiute aua le Tala o le Tupe.

Ae pau lava si au tatalo i lau Afioga i le Minisita, e le toe na ma le laina foi le talosaga a lenei itumalo, masalo o lea na outou maua talu ai nei le poloka o le faigalotu lea a Falealupo i le auala laupapa lea i Sapapalii ua le oo ai se faigalotu a le atunuu atoa i se Aso Sa e le i mavae atu nei i le aualalaupapa lea i Sapapalii na poloka ai. Ua uma ona saunoa manino lau Afioga, o lea o le a faatino auala laupapa ia ona muamua mai lava lea o Sapapalii i le saunoaga a lau Afioga.

E pei o le mafuaaga lena e tatalo atu ai, a o lea ua tutupu mafuaaga. A o le mea lava e faapopoleina ai lou sui usufono, leaga o le va o le falemai i Tuasivi ma Salelologa e masani ona tuli mai ai e ua gasegase tigaina mo le vaa, e tele lava ina poloka i le auala lea. E talitonu lava o le tatalo lena, lau Afioga i le Minisita, o le tatalo lena, silasila ane i le tulaga o le auala laupapa i Sapapalii mo se fesoasoani.

FOFOGA FETALAI: Toe lua miniute o le sui usufono.

Susuga PAPALII LIO FAAVAIVAIOMANU TAEU MASIPAU: Ona ou oo mai ai lea i le Matagaluega o Fuainumera Faamauiina, faafetai lava o lea ua matau atu o lea ua i ai le tupe faaopoopo mo le vaega lea. Aua tasi lea mea sa ou laga i lauga lautele i le tatou Tala Autu o le Tupe, o se vaegatupe faapitoa ina ia faaauau ai pea galuega a le Matagaluega lea, aemaise lava sailiiliga o gasegase ma totonu foi i le atiaaina o aiga, o lea ua i ai le tupe lea, malo faafetai. Ou te talitonu lava ua aoga foi le matou lagalaga atu o lea ua faatino mai i lea vaega o le fesoasoani.

Ona ou oo mai i lea i le Matagaluega mo Tupe Maua, malo faafetai, e lagolagoina lenei Matagaluega, ona o le ivitu lea o le sailiga o le tatou tamaoiga o le Matagaluega lenei. Ua maitau atu foi o le seleni fuafuaina mo Matagaluega mo galuega atiae ma aoga taua foi nei mo le faaleleia atili o le auaunaga, ae ou te talitonu o se seleni aoga foi lenei i le Matagaluega. E maitauina foi le Matagaluega o Tupe Maua, e talitonu e le tele se tupe o agai i ai, ae talitonu o lea e afio mai le Minisita, malo faafetai i lau Afioga ma le Matagaluega mo le aoina o seleni aua le tatou galuega fai.

Ou te talitonu o se manatu lena o lenei sui usufono, ou te manatu foi o lea ua avatu manino se agaga o lenei usugafono. Ou te talitonu lava o le a silasila i ai lau Afioga i le Palemia ma le Kapeneta aua foi le agai i luma o le tatou atunuu aemaise foi o lenei itumalo. Ia manuia lau Afioga i le Fofoga Fetalai, manuia foi le Palemene. Faafetai.

FOFOGA FETALAI: Malo faafetai. E fautua atu pea i le paia ma le mamalu o le tatou Maota i tulaga masani, e pei lava ona ou taumafai atu i le taimi ua sola, o le Tala Faatatau o le Tupe lenei, o le Tala Faatatau Faaopoopo o le Tupe. Ua lava a outou tuleiga ma saunoaga i fautuaga o le tulaga o le tatou Tala Autu i le tausaga na tea nei, na o le \$10,790,000 lea tatou te talanoa ai, ma e fautua atu pea, ia saunoa tonu i le Tala o le Tupe, i le tulaga aoatotele aemaise foi le iloiloga auiliili ma agai i talosaga i le Malo i mea e fia faaleleia o itumalo. E talosaga atu ona o le faamaumauga o lo outou taimi, ae ua avanoa le tatou Maota mo se isi saunoaga.

Ia, tulai mai le sui usufono mo Alataua Sisifo.

Afioga LAFATELE PATRICK LEIATAUALESA (Alataua Sisifo): Lau Afioga i le Fofoga Fetalai, ou te tulai atu ma le agaga faaaloalo i lenei foi taeao e solitulaina le maualuga o le Maota o le atunuu i le Taitai o le le Malo, faapea foi le maualuga o sui usufono na faia mai le fuifui, o lupe na faalele aua le tapuaiga a itumalo.

A o le i oo sa matou faamatalaga i lenei taeao lau Afioga i le Fofoga Fetalai i le Tala Faaopoopo o le Tupe e pei ona taoto nei i lumamea, e ao ona matou faatalofa atu i lau tapuaiga Samoa i paia o aiga e fia o le atunuu, i le nofo a faleupolu aua oe le Usoga, aemaise o le aufueloloa ma tootoouli o le tapuaiga a le atunuu. E le oo sa matou tala i paia sautuafafafa e amata mai Manuatele, seia paia eleele sa o lenei itumalo, ou te talitonu o Samoa o le atunuu tofi. O paia masani, o le a taoto atu i le Maota lenei.

I le tapuaiga a si ou itumalo, ou te faatalofa atu, e faafeiloai atu i le kerisimasi ma le tausaga fou, e manatu sa outou maua se faiga malologa fiafia i le paia i le ta itumalo. E faatalofa atu i le nofo a Faalupea i le paia i lau fetalaiga Folasaga, aemaise lena itu o le ta Alataua. Lau Afioga i le Tama a le Malo ma le Alataua lau Afioga Momoemausu faatalofa atu i lena foi itu o le tatou nuu. E faapito augafa se matou tala i lenei taeao fou i le maualuga o le afio o lau Afioga Tonumaipea faapea le Matua Tauiliili, le toafa o le Aiga Sa-Moeleoi, lau Fetalaiga Taatitimanaia ma Tuaiiaufai, o oulua Igoa ma Tapaulefano o le Alataua. E faatalofa atu foi i lau Afioga i le Valasi ma Tilomai aemaise le paia maualuga o le tatou nuu i ona tulaga faalupe, le paia o le Aufaigaluega i le paia o Ekalesia e tolu o le Metotisi faapea foi lau Susuga i le Epikopo. Malo tapuai, o lea ua lamalama faaii foi lenei Paeaiga, ou te talitonu o le nuu tofi.

O se matou tala i lenei taeao, tapuai maia, e le tele se tatou sao i le Tala Faatatau Faaopoopo o le Tupe pei ona taoto nei i le Laulau a Fono, e matau atu lenei usugafono na o le \$10,700,000+ o se tupe e laititi. Ae talitonu le faamoemoe o lo o faaopoopo pea i lea tausaga ma lea tausaga. E le galo foi sa matou faafetai i Faaluuluga o Matagaluega a le Malo, faapea foi le aufaigaluega a le Matagaluega o Tupe, e o lo o nafa ma le tapenaina o lenei faamoemoe ma aumai i le tatou Maota.

O la matou tala i lenei taeao lau Afioga i le Fofoga Fetalai, e leai foi se agaga e fai atu se tala ona o nisi autafa ma nisi tulaga. Na pau la matou fautuaga i le taeao lenei, na o le tasi lava le Matagaluega e agai i ai sa matou tala. E le faapea ou te fai atu e fai i le Tala o le Tupe lenei aua e le lava, ae na ona fautua atu ma tuitui atu ma faamanatu atu, ona o tulaga foi e pei ona i ai lenei itumalo. Lau Afioga i le Minisita mo Aoga, matou te valuvalusia aa o le fau i sou finagalo, ma e faamanatu atu pea le faleaoga, e lua faleaoga o lenei itumalo o lo o tuua, o le faleaoga muamua o si ou nuu o Falelima, pei ona silafia ua leva ona tala i lalo le faleaoga, ae o lo o taumafai lava.....

FOFOGA FETALAI: Malie lau Afioga i le sui usufono mo Alataua Sisifo, se i tuu atu le avanoa, o lea ua amanaia e le Afioga i le Minisita o Aoga lou tulai mai. Tulai mai lau Afioga i le Minisita.

Afioga Hon Magele Mauiliu (Minisita mo Aoga, Taaloga ma Aganuu): Faafetai lava i lau Afioga i le Fofoga Fetalai mo le avanoa. E le o i ai le Matagaluega o Aoga i le Tala Faatatau o le Tupe. Faafetai.

Afioga LAFATELE PATRICK LEIATAUALES: Sa ou faapea o lea e manino lava le faafogafoga mai a le Afioga i le Minisita o Aoga. A lea na ou fai atu i taimi ua sola ma ni fatia ua alu, se e le o fai atu sa matou tala o le Tala o le Tupe lea, na o le matou fautuaga ma le faamanatu. E tasi lava le matou mataupu lea e avatu, ma o le lauga a Alataua Sisifo, a ia manatua, e tusa lava pe le faia, ou te toe sau foi i le palota.

Ia o le matou tala i lenei taeao i lau Afioga i le Fofoga Fetalai, e pei lava ona ou fai atu i le taimi ua sola ma fatia ua alu, e leai se agaga e faatauta foi i le tele o galuega lelei a le Malo. A matau i le itumalo lenei, tasi lenei itumalo ua matua sapi ma fiafia ma aleluia ina ua tau lau o le faamoemoe i se tasi o galuega tele, o se galuega e le galo i le itumalo lenei, o le suavai taumafa pei ona matou inaina atu ai i le tele o taimi, ona o le tulaga lava o le fia faaleleia o manaoga na ala ai ona omai i totonu o le Maota lenei o Samoa.

Lau Afioga i le Palemia faapea foi le maualuga o le Maota lenei, e faapena le agaga o lenei usugafono, o Lafai e le o se tagata e faamaualuga, ae a i ai loa se mea e faaletonu, e avatu sao lava a matou upu. Ae faamalulu atu i lau Afioga i le Minisita mo Aoga, Taaloga ma Aganuu. O le agaga lena o lenei sui usufono, matou te faamanatu ma tuitui atu aua tulaga o manaoga o le itumalo, ina ia mafai ona faaleleia pei ona i ai foi le tatou valaaulia foi i lenei vaitau o le soifuaga.

Lau Afioga i le Fofoga Fetalai, malo lava mo le taitaiga o le tatou Fono, e le faigofie lau galuega, ae ou te talitonu o le ala lena na faalautele ai e le Atua ou tauau ma lou fatafata e te feagai ai ma faafitauli o le olaga lenei.

Ia, lau tapuaiga Samoa, matou te manumanu i lape o upu, matou te faamalulu atu i lenei taeao fou, o le a foi sa outou faafogafoga i sa matou tala ua le tautamaliia, ia matou te matua atu i lau tapuaiga, ia faamagalalo mai se matou upu ua le tonu i lenei taeao.

Ia, lo tatou itumalo, o lena ua outou faalogologo mai, pei lava ona tatou feiloai ma aumai foi la outou tuualalo i le tatou faleaoga, ia mau pea le toovae, e le i fausia Roma i se aso se tasi, ae ou te talitonu o oe o le itumalo e lava le onosai, e pei foi ona i ai le tatou galuega o le tatou suavai taumafa sa tauanau ma finau ma tuitui pea i le Malo, a o lea ua tatou saa i maa o malie.

Lau Afioga i le Fofoga Fetalai pei ona i ai se matou tala i le taeao lenei, e alu se asiasiga a le Afioga i le Palemia ma le Minisita o Galuega i le atunuu lenei, ia, e matautia le suavai taumafa o le itumalo lenei, ua pepese fiafia ma ua maua le suavai mai le lagi. Ou te le iloa po o lea le mea na ala ai ona tuai, ia ona o le faaletonu foi o e na autovaa mai i le lē tuitui ma tauanau i le Malo, ae momoli atu lo matou agaga faafetai i le taeao lenei.

O le a foi se matou upu i lau tapuaiga Samoa, e faamalo atu i lau tapuaiga, e le faigofie lau tapuaiga. Ou te manatu o le Maota lenei, e le o se Maota e fia utuvaitofo i ai se sui usufono, o le Maota e faaaloalo i ai i le tele o Tulafono a le atunuu lenei na faufau mai e o outou tuua ma o tatou matua, o lea ua sapi ai le taitaiga o le tatou atunuu ma folau ai le tatou sa ma le manuia. O le matou tala lena i lenei taeao. Ia manuia le Fonousu a le atunuu.

FOFOGA FETALAI: Malo saunoa i lau Afioga i le tofi o le Alataua Sisifo. Ua avanoa le Maota mo se isi saunoaga a se sui usufono mamalu.

Ia, tulai mai le sui usufono mo Faleata Sasae.

Tofa AVEAU TUALA LEPALE NIKO PALAMO (Faleata Sasae): Ia, e muamua ona sii le viiga i le Atua, e muamua foi ona ou faatulou i le paia ma le mamalu o le Maota Fono nei i Tiafau, faatulou i lau Afioga i le Fofoga Fetalai, le Afioga i le Palemia ma le Kapeneta, aemaise foi o le mamalu o le Palemene, faapea foi Faauluuluga o Matagaluega, le Aufainusipepa ma le mamalu o le Palemene.

Masalo o le taeao lenei, o le a ou le toe oo i paia ma faiga o Samoa, o lena ua uma ona e paepae ma e faapaia. Ona o le taumafai la e puipui lou taimi, o le a ou le oo i ai, ae o le a nuunuu atu ia Tumua ma Pule ma Faleupolu o Tofiga, aua o le latou fatuaiga tausi lea. Ae muamua pea e tatau lava ona ou pai tasi i si ou itumalo o Faleata Sasae. E pei lava ona silafia e le mamalu o le Palemene, o le tausaga mulimuli lenei o le tatou Paeai.

Ou te faatalofa atu i si ou itumalo sau mai Vailoa seia paia Vaimoso. O paia lava ma sa ma faiga o le a ou le oo i ai, ae ou te iloa ua malosi foi le sui usufono o le Itumalo ona o le lelei o le tapuaiga, aemaise lava i le paia i le Tama a le Fale, Usoalii ma le Matua ia Patauave, aemaise foi o lo oulua toalua ia Une ma Manuleleua ma oulua Aiga, afifio o Matua. E faapea foi le afio o Faumuina ma Tamapaa, le Saofaiga a le Atua ma le mamalu ia Faleata, faapea foi le tapuaiga a Nuu ma Leatinuu ma le Faiga, aemaise foi o Faleata atoa. Ia tapuai maia ae sei fai se manatu i le Tala o le Tupe mo le amataga o lenei tausaga.

O le Tala o le Tupe pei ona faataatia, e le o se... pei lava ona saunoa nisi o sui usufono, e le o se Tala o le Tupe tele, ae i ai nai vaega taua o lo o tau mai ai i totonu o le Tala o le Tupe lea ma o le a ou taumafai e ootoo atu i vaega taitasi. O le vaega muamua, o le a fai sina au tamai lauga i Matagaluega uma a le Malo, na o se fautuaga aua foi le amataga o lenei tausaga. O le Matagaluega o Faatoaga pei ona fatulai mai ai le Tala o le Tupe, o le tele o fautuaga lea ou te vaai atu ai i totonu o le fautuaga a le Komiti o Tupe lea na i ai, o lo o i ai le fautuaga e faapea; e faatu ni solar panels foi nei e puipui ai le tau o le eletise. A tagai foi i le fautuaga a le Komiti lenei, e tele lava i le taumafai e puipui le tau o le eletise. O lona uiga, o se tasi lea tupe tele o lo o i ai i totonu o le Tala o le Tupe lenei, o se seleni o lo o faamatuu atu ina ia mafai ai ona totogi le pili o le eletise. O lea la e i ai lau fesili, masalo o lau

fesili e agai foi i le Minisita o Galuega o lo o pulea le EPC. O lau fesili muamua, o lea e tele mai fautuaga a le Komiti lenei i le taumafai lava lea e fai pea le solar panel a le Matagaluega latou, ae tagai foi, masalo po ua fa kamupani lea ua faatu a latou solar i totonu o le atunuu lenei. Ou te iloa foi ua i ai le kamupani ua amata ona faatino le latou auunaga, le kamupani lea mai Niu Sila lea e i ai le solar lea i uta i Tuanaimato; ia faasao mai au pe a... Afai la ua faatino lea vaega, o le a se fesoasoani i le mamalu o le atunuu ua i ai nei talu mai ona faaaoga le solar lea? E le gata i lea, afai ae ola uma solar ua i ai nei, pei ona silafia toeitiiti uma ona aafia le isi itu o le tatou malae vaalele i solar, le isi atoa lena ua i ai i ina. O lau fesili la; o le a se faamamaavega o lo o i ai nei, pe o mafai ona forecast mai e le Matagaluega se faamamaavega i le mamalu o le atunuu aemaise la Matagaluega ia. Po o le a se alu i lalo o le eletise, aua e le o se mea faigofie. Sa ou fesili i le Komiti lea na faia le Lipoti, pe ua latou auiliilia la pe fia se tupe e alu e faatu ai mea nei a Matagaluega taitasi? E fia se seleni e alu ai? Afai foi la o le a faatino, e fia se seleni e alu ai i lea vaega? O lau fesili ou te fia malamalama ai po o le a se mea ua i ai kamupani tetele nei, ou te talitonu e tataua ona tele se faamamaavega i le tau o le eletise.

A o i ai pea i le Matagaluega lea a le EPC, masalo ua tolu tausaga, o le tausaga ua tea na o atu ai nisi o le sui o le EPC e fai se sailiiliga, ona o lou talitonuga o lo o faatau e tagata o le Matagaluega ni uaea, o lo o faaaoga i ni kamupani o lo o lauina le copper i fafo, e le o se mea fou. Masalo e le o se mea fou....

FOFOGA FETALAI: Malie le sui usufono mamalu, ou te vaelupeina le saunoaga i le mataupu ona o... Se i tulai mai lau Afioga i le Minisita mo le Faalapotopotoga o Malosi Faa-Eletise.

Afioga Hon Manualesagalala Enokati Posala (Minisita mo Galuega, Felauaiga ma Atinae Eseeese ma le Faalapotopotoga o Malosi Faa-Eletise): Faafetai i lau Afioga i le Fofoga Fetalai, e faatalofa atu foi i le maualuga o le tatou Maota nei i lenei tausaga fou. O le mataupu e pei ona laga i le tulaga lea, o lo o faaauau suesuega a leoleo ma faatino suesuega a leoleo. O lea e talosaga atu ai, taatia le mataupu se i maea suesuega a leoleo o feagai ai, a o lea ua maua. O lea ua i ai polokalame a le Faalapotopotoga mo e ua aafia, o le tulaga o i ai, sa alu le latou... o la e i ai uma lava auala e mafai ona monitor ai lea vaega, o le GPS o lo o faaaoga e taavale, ua maua vaega ia, a o lo o tuuina atu la i le Matagaluega o Leoleo e faatino le latou suesuega ma moliaga, pei la o le taotoga lena o lea e i ai le tatou mataupu.

A o le isi vaega lea pei ona saunoa i ai le sui usufono mamalu i le solar, o le tulaga lena e i ai, o le tilotilo lava i le aotelega lea e i ai, 2017 ua 100 pasene le tulaga i le renewable energy mo tatou. O le taimi lenei ua uma ona saina le maliega e faatau mai ai le eletise. E leai lava se eseesega ma le tulaga lea e aua le faitauina fuamoia e le i fofoa, o la e ua faatino galuega, o la e ua... o upu lava vaeatu lou gutu ma le afi, o la e ua tuufua, e oo i le tulaga i le faatinoga e kamupani eseesese ia, o le mea lena o lea e i ai, o la e mataitu. A o le vaavaai i le lumanai, o le 2017 lena e target ina ia oo atu i ai ua tele se suiga o le tatou.... O le tulaga foi i le tau, o la e faatino i le taimi lenei e galulue faatasi ai ma le Pule Faatonu ma le Regulator e faatino le tau o le tatou eletise mo le tausaga lenei e faasolo atu i le isi tausaga. O mataupu uma

na o la e vaavaai i ai, ae ua tele se suiga talu ona fesootai le tatou tulaga lea i le eletise sa fesoasoani mai ai Niu Sila, aemaise o le matagi lea e faatino i Aleipata, manaia tele, lelei tele le fesootaiga mai i totonu o le Grid, malosiaga faaeletise ma ana auunaga, o la e foi ua silasila i kamupani ua uma ona saini maliega ia, o lea ua amata ona fau a latou plans ma tulaga na i le malae vaalele, e faapena foi Tuanaimato i le mea o i ai, a o le target lena o lea e agai i ai.

Ma le faaaloalo lau Afioga i le Fofoga Fetalai.

FOFOGA FETALAI: Malo faafetai. Ia se i tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, masalo pe a ma le fa tausaga talu ona ave le faatonuga a le Kapeneta e sailiili uaea ia na lipoti mai ua masalomia le aafia ai o tagata i le aveeseina. Na amata atu i pou ia e tuu mai i i a le aufai telefoni i mea ia o uaea copper.

E le na o Samoa e tupu ai le mea lea, e tupu foi i Niu Sila ma tupu i isi atunuu. Na ou faitau i le lipoti o le isi gaoiga copper. Na o le aiga e malolo i le kerisimasi ae ai na iloa e le au gaoi. Na o atu lelei lava taavale tutu lelei ma talai. Na faapea tuaoi o se galuega na faatonuina e fai. Na alu le aso atoa o tala uma mai lava copper uma lelei lava, o ae faatoa foi mai le aiga pe atoa le lua vaiaso ma fesili. Na faatoa iloa ai o le mea lea na fai i le ao teatea, na fai e tagata gaoi.

O le mea lea o le copper e taua tele ma e maua le tau i le maketi. E le i umi lava la ona fai suesuega, a o le faigofie ia, aua e le tele lava ni tagata e avea i fafo ni uamea. Ona pau lava le mea e fai o le vaai uma o aiga ia e fai a latou pisinisi. E pei la o le tulaga lena o lea na agai i ai suesuega, ma o lea ua saunoa atu le Minisita.

O le lalolagi lena tatou te i ai, e tupu loa le mea faapena, e fiu lava. A maua atu foi ia tagata ae fai ane foi lapiti a ia tagata. O le lalolagi lava o lea e fealuai le tiapolo. A aveane ai tatou, ae na oo lava i le Alii o lea sa filo ai lava ma le tiapolo e faaosooso lo tatou Alii?

Lau Afioga i le Fofoga Fetalai, o le mea lena e taua ai, faafetai lava i le Minisita ma le latou Matagaluega i le mataalia ona o lea ua fai fai lava suesuega, e ui lava ina ua umi ona fai, ae o lea ua iu lava ina maua.

Lau Afioga i le Fofoga Fetalai, o le taua lena o le fesili lea na aumai.

FOFOGA FETALAI: E manatu ona o le mataupu ua i aao nei o le Tulafono, e fautua atu i le sui usufono, see ese ma le mataupu lea o lo o ua faaauau suesuega a le Matagaluega. A o le mea e sili ma le taua, o lea ua tatou iloa ina o lea ua amata ona suesueina i latou na faia ia solitulafono. Ae e le mafai ona tatou tautalagia se i maea mai lipoti a le faamasinoga na faia faaiuga o e na aafia.

Ae tulai mai le sui usufono mamalu, e manatu foi o lea ua tali malamalama le Afioga i le Minisita i nisi o forecast ma tala tatou te naunau ai po o le faamanuiaga o mea tau solar system, ae tulai mai le sui usufono e faaauau le saunoaga.

Tofa AVEAU TUALA LEPALE NIKO PALAMO: Faafetai i lau Afioga i le Fofoga Fetalai, faafetai foi i lau Afioga i le Minisita, aemaise foi lau Afioga i le Palemia mo le faamalamalamaina o le tele o mataupu, ia o le a ou see ese ma le vaega lea, pau lava lau fautuaga ia vave maua le faaiuga ne i te i foi ua pau i le atunuu ia le tau o ia vaega.

Ae momoli lau faafetai i lau Afioga i le Minisita ona o le paipa lea ua faatino e alu i o i Papaseea, aua pei ona silafia, ua tele tausaga e le au le paipa i luga i Papaseea ai o le aega o lea vaega. Ae silasila foi, o le tasi lenei Mataaga a Samoa e vaai i faamaumauga a le ofisa o Tagata Tafafao Maimoa mai e ese le toatele, e aupito i toatele lava tagata e o i ai i i le vaega lea i Papaseea, ae fai lava sina faanoanoa ona e le o oo i ai le paipa. O lea la e tatalo atu ai i lau Afioga i le Minisita o lea ua faatino le galuega, ia se i faataunuu ifo i o, ma le faaaloalo lava.

Ona ou oo mai ai lea i le Ofisa o Faatoaga, e momoli lau faafetai i lau Afioga i le Minisita o le Matagaluega i galuega foi o lo o faatino i le Ofisa o Faatoaga, o lea ua vaai atu i le Tala o le Tupe o lea ua amata ona sii le tatou Matagaluega i le tasi itu o le fanua ona o lea o le a faatu ai le fale o le atunuu foi lea o Saina i le mea lea sa i ai nei le Ofisa o Faatoaga, atonu o lea foi ua maua mai le fesoasoani i i.

Ae i ai le fautuaga lea e aumai a le vaega lea i i a le Komiti lea o Tupe agai i manu papalagi, se i tagai ane i ai lau Afioga i le Minisita, aua pei e foliga mai e le o fetau le faitauina o le aofai o ia foi faatoaga a le tatou atunuu po o lafumanu.

E i ai lava lau fesili lau Afioga i le Minisita, atonu ua fai soo foi lau fesili ua se tai taliga foi i lau Afioga i le Minisita, ae ou te fia fesili lava i le polokalame lea o le SACEP. O lau fesili, pe fia ni tagata faifaatoaga o lo o ua i lalo o le polokalame lenei e oo mai i le taimi lenei? Aua pei ona silafia, pe tusa ua fa nei tausaga o faatino le polokalame lenei. O lea la ou te fia fesili ai i lau Afioga i le Minisita, pe toafia ni aufaifaatoaga i Upolu, ae toafia ni aufaifaatoaga i Savaii o lea ua i lalo o le polokalame lenei? Ae silasila e le o se tupe laitiiti. E i ai lou popolega ina ne i te i ua maea le polokalame lenei, e le i maea le seleni lea. O le mea lava lena e ala ai ona faufautua pei ona silafia foi e lau Afioga i le Fofoga Fetalai ma le mamalu o le Palemene, e leai lava se tausaga ou te le taua ai le tulaga lea, ona e taua tele, ona o le polokalame lenei e manuia ai lo tatou atunuu. Ia se i tagai ane lau Afioga i le Minisita i le vaega lea. Afai foi la e fia se aofai, ae fia se aofai o se tupe ua faaalu i ia vaega o le aufaifaatoaga? Ona e ese le taua o le polokalame lenei, e tatau lava ona faatino lelei ina ia maua ai le manuia o tatou tagata.

Ou te faafetaia le Matagaluega i le faatinoina o le polokalame lea na i ai le \$5miliona foi lea o le Afa, lea ua manaia le faatinoina o lea vaega, faafetai i le Matagaluega, manaia le faatinoina o le vaega lea, o lea ua solosolo lelei foi i totonu o nuu ma alaalafaga. A o le vaega lea o le SACEP ona o lea e fai ma tau asiasi foi nai nisi o nuu o lo o i ai le vaega lea, e i ai lava nai faaletonu laiti na e i ai. Ae o le a taatia atu i le Matagaluega e tagatagai i ai ma aumai ai lea o se fautuaga i se taimi o i luma o le tatou fonotaga.

Ona oo mai lea i le Matagaluega o Faamasinoga ma Pulega Tau Faamasinoga, o lea ua afio mai le Afioga i le Minisita mo Faamasinoga, e faigofie lava lau fesili, o le Tala o le Tupe lea na maea atu nei, sa i ai le faaupuga foi lea sa fesiligia o le repays or fees service fees. O le mea lea ua tupu ua tai selau pasene le siitaga o fees nei. O i i le Ofisa o Faamasinoga o le

faamauina o le matai lea ua i ai nei ua \$100 mai le \$40 sa i ai, e le na o le Ofisa la o le Faamasinoga o lea e i ai le vaega lea, e oo foi i i le Ofisa o lea e fai ai laisene o taavale ua alu i luga i le 100% le sii e te alu e fai lou laisene, amata mai nei i le tausaga fou ma isi lava auaunaga, ou te iloa e leai ma se vaega a le Malo e le o i ai se siitaga o vaega ia, masalo foi o lea ua fou, e i ai foi ma siitaga fou ua i ai, e i ai mea fou sa le totogiina a o lea ua totogi ua amata ai ona foia e tagata le o e sue se fesoasoani. O lea ou te toe tatalo atu ai i Afioga i Minisita, se i toe tagatagai ane i vaega ia, ona e le faigofie, ae afai foi ua fai siitaga nei, e i ai se formula na fai ai ia siitaga e sii mai ai i le 100% pe sii i le 50%, pe sii i le fia, e i ai se vaega foi lele e fuafua i ai le vaega lea? Ina ia ogatasi uma, aua o le autu o le siitaga lea pei ona saunoa le Afioga i le Minisita o Tupe, ina ia siitia auaunaga a Matagaluega ina ia lelei le faatinoina o le auaunaga ina ia alu atu le tagata o le atunuu e saili e fia maua se fesoasoani, a o lea e lelei le auaunaga. E tatau la ona i ai se base fees e sii ai le vaega lea, ae le o le pule lava le Matagaluega ia i le ituaiga sii e sii ai. A o lea ou te talosaga atu ai i Afioga i Minisita e ui atu i lau Afioga i le Fofoga Fetalai, se i toe tagatagai ane i vaega ia.

O le vaega lona tolu ou te fia talanoa ai, o le vaega lea o le siosiomaga. O lea ua tele ia.....

FOFOGA FETALAI: Malie le sui usufono mamalu, se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o au lea ua tau taavili le lalolagi i lou mafaufau, o i latou lava nei e tutu mai fai mai, e tatau ona vaai totoa Matagaluega i a latou tupe maua ma Faalapotopotoga i a latou tupe. O lea ou te tau matauina nei po o ua ova ma le luasefulu tausaga talu ona \$40, ua fai sina leva, ae o au lea ou te paso i le mea lea o le finau mai o le Itu Agai e taofiofi le loan ae vaai ia tupe maua, o lea foi la ua liliu Matagaluega e fai lelei a latou tupe maua, a o lea foi ua toe faasea mai, aemaise foi mo Faalapotopotoga Tumaoti. Ia soia ia le gau, gau, gau pea, ae se i faaleleia a latou tupe ina ia aumai ai le latou seleni e fesoasoani i le Tala o le Tupe. O le mea la lea ua tupu, a tulai atu ia Matagaluega ma Faalapotopotoga e faatino a latou fautuaga nei e fai mai, a o lea foi ua toe faitio. O le a ea le sao? Ae a o foi le Malo e nono, ae fai mai ua le tatau ona toe aitalafu, o le a faatau e Saina Samoa. O le a tonu le sao? O la e i ai le faautaga tatau. E taua le saunoaga lea na aumai nei, ia faaleleia le tautua. Ou te matua faamalo i le Tamaitai Minisita, o le mea lea na matou vaavaai nei i ai i le vaiaso le la, na ona alu lava o le mea i luga o le computer, fai atu loa le isi, “se i aumai lava sau kopi,” na ona oomi lava o le ki puna mai i fafo le kopi, pe na o le lua ea sau le kopi, e matua matautia le mea lea ua i ai. A o aso ia, e te fiu e afuafu i le vevela faatoa oo mai le kopi ia oe, a o le taimi lenei, ua ese lava le mea lea ua i ai. Ia pe alu alu alu le gasologa lea ua i ai nei le soifuaga, e te le toe tigaina e te alu i o, na ona e manao lava ua ou fia taele, sau le paipa taele, ua ou fia alu i o i le fale le taua, sau le.....na o le oomi lava o le ki. O le mea lea ua oo i ai le lalolagi. Ia o le tali atu lena i le sui usufono mo Faleata Sasae.

Tofa Lealailepule Rimoni Aiafi (Faleata Sisifo): Lau Afioga i le Fofoga Fetalai.....

FOFOGA FETALAI: E le i aafia lou suafa le sui usufono mo Faleata Sisifo i le saunoaga a le Afioga i le Palemia.

Tofa Lealailepule Rimoni Aiafi: Leaga o lea e saunoa faalauaitetele le Afioga i le Palemia i le matou vaega, a o lea e fai atu ai, leai o le siitaga e lelei, a o le mea lea e fautua atu ai lenei vaega, se i sii tai 5%, tai 10%, a o le sii tai 100% tai 200%, o le mea la lena o lea e fautua atu ai.

FOFOGA FETALAI: O lea ua maua le saunoaga a le sui usufono.

Susuga Hon Tuilaepa Fatialofa Lupesoliai Aiono Neioti Sailele Malielegaoi: O le mea foi lena o lea e fai ai le fautuaga, se tai tolu, tai fa tausaga ona toe tilotilo lea e toe teuteu, ae le o le faatali se i atoa le 20 tausaga faatoa teuteu, ia o lea la ua teu atu ae ua tete'i. E leai lava se te'i a le tagata e malamalama, e toafilemu ma malamalama, a o outou lava nei ua tutu soo mai pei ua te'i. Ia lau Afioga i le Fofoga Fetalai o le fesoasoani atu lena, ia o lea foi ua tu mai le isi te'i.

Afioga Hon Palusalue Faapo II: Lau Afioga i le Fofoga Fetalai o se mea e fia faamalalama.

FOFOGA FETALAI: Ia se i tulai mai le Taitai o le Itu Agai.

Afioga Hon Palusalue Faapo II: Leaga o lea na tuuaia i le saunoaga a le Afioga i le Palemia lenei itu, fai mai e fautua atu, fautua atu, ina ia faalelei le auaunaga. O le matou galuega lea e faufautua, ana silasila totoa le Malo e faaititia tupe ia e leiloloa ma faaletonu le faaaogaina, e le siia auaunaga ia, e le siia auaunaga ia, faaputuputu mai tupe o lo o...pei ona aumai i le Lipoti a le Suetusi Sili. Pei o tulaga ia e faufautua atu ai i lau Afioga, ae matou te le tetee i tulaga o mea e fia faaleleia, aemaise o auala la e pupu lava....

FOFOGA FETALAI: O lea ua maua le finagalo o le sui usufono. Malie le Taitai o le Itu Agai.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o se mea e fia faasao. E faatoa uma atu nei lava lau faamatalaga, vaai, o Iuta lea sa faalaina lo tatou Alii, o le teutupe, o le teutupe lena a uma nei ia se latou talaiga i lea mea ona gasolosolo mai lea e omai le aumatitiva, omai le aumauoloa, tuu tupe i luma o le ausoo le au aposetolo, ia tuu i ai o isi o le aumaumea aemaise lava o le au Roma, ia e omai tuu a latou auro, ona tuli loa lea o Iuta e alu e faaliliu, e faaliliu mea nei o money changes a, mea o auro, na o le Atua e silafia uma mea uma, alu loa Iuta sau loa ma tupe, alu ane fai lea mea valea, fai lea mea valea, nofo i le hotel, hire ia tamaitai e latou te tafafao, oo mai i i, ae fai atu Iesu, "sole tuu lau amio," fai mai, "o ai foi le gutu umi na nofo ma lipoti atu nei mea ia te oe." Ua ala ona ou fai atu ia te oe, vaai, e oo ia Iuta, gaioi, pepelo, faalata. E faapena le mea, leaga o lea e fealua lava satani i le lalolagi nei. E fiu lava le Malo e taofi atu lea ma lea, ae tupu lava. O le tulaga lena, ua ala ona ou taua atua ia te oe, o lea e tau atu nei ia au e leai sou tofi, a o oe o le

Tiakono Toeaina, a o lea e te le malamalama i uiga sa tupu. Ia o lea ua tu mai le isi tiakono.

FOFOGA FETALAI: Se i tulai mai le Sui Taitai o le Itu Agai.

Afioga Hon Aeau Peniamina Leavaiseeta (Falealupo): Lau Afioga i le Fofoga Fetalai ma le ava e tatau ai. E matou te le o talanoa atu i le vaega lea o Iesu ma Ona soo. O lea matou te talanoa atu i ana Minisita i lalo o le isu o le Palemia lea la e faaletonu ai, alu ai loa a tatou tupe.....

FOFOGA FETALAI: O lea ua maua lou finagalo. Tulai mai le sui usufono mo Faleata Sasae.

E manatu ua manino lau folasaga ma lau fautuaga na ave i le Malo, see ese o lea o le a uma lou taimi.

Tofa AVEAU TUALA LEPALE NIKO PALAMO: E talosaga atu foi i le tatou Vaega faamolemole se i tuu mai se avanoa.

O le siosiomaga, faafetai o lea ua tali atu Leala i le tulaga lea ma o le a ou le toe oo i ai. A o le siosiomaga, faafetai lava i le tele o galuega lelei ua faatino, ae i ai nai vaega ia lau Afioga i le Minisita. O le vaega muamua e faatatau i le fonotaga lea a le SIDS. E i ai ea malulu ia sa i ai, o lea ua maua tala ua tufa fua. Ua oo lava i le tai 30 ea malulu a le tagata e toatasi. Sa fesiligia lea vaega pe aisea ae po o le a foi le faiga o lea vaega? Sa faapea mai sa faasalalau.....

FOFOGA FETALAI: Malie lau Afioga i le sui usufono mamalu se i avatu le avanoa i le Minisita ina ia faigofie ona tali atu ona e le taugofie tuuaiga ia ua tuuaia ai le Matagaluega.

Tulai mai le Minisita mo Punaoa Faanatura ma le Siosiomaga.

Tofa Hon Faamoetauloo Lealaiauloto Ulaitino Faale Tumaalii: Faafetai i lau Afioga i le Fofoga Fetalai mo le avanoa, e faafetai foi i le sui usufono mamalu i le mataupu ua laga mai.

O le tulaga e faapea ua tufa fua air conditions ma florescent lights foi ia, e leai e sese lea tala. O lea e ave i e ua uma ona filifilia e fai ai le poloketi lea e siaki ai le climate change. O technical assistance to climate change aua o le tele lava o vaega ia e ave i ai air condition unit ia, o lea e ave i Matagaluega a le Malo faapea foi Faalapotopotoga tumaoti ona o le tulaga foi lea ina ia sui ai air condition units foi ia o lo o i ai le kasa lea e afaina ai le ozone, ma e tele foi le eletise e faaoga ai i le faaaluina o units ia. O lea la ua avatu units ia e laitiiti le eletise e faaoga ai ma leai foi ni kasa ia, ae ao mai e le Matagaluega units tuai ona avaeese lea o le kasa lea.

E pei o le tulaga lena i le poloketi lea e pei ona fesiligia, ae leai se tulaga foi lea e faapea o tufa fua. A o vaega uma ia o lo o ave i ai units ia ina ia faigofie ai foi ona o atu le Matagaluega aua o lea e fuafua o Mati e alu ai le monitor ina o units ia i le tulaga i le poloketi lea e tau o le technical assistance, ma o le faamalalamalama lena i le tulaga lea e tusa ai ma le faafesili.

FOFOGA FETALAI: Faafetai i le faamalamalamaga a lau Afioga i le Minisita. Tulai mai le sui usufono e faaauau le saunoaga ua toe lima ou minute.

Tofa AVEAU TUALA LEPALE NIKO PALAMO: Faafetai lava i lau Afioga i le Minisita. O le mea lava ia o la e tufa fua. E moni o lalo o le poloketi, a o la e ave fua i tagata e le o faatauina ma e leai se tupe o alu ai. E i ai foi le mea faapea e faapipii foi e le Matagaluega, ou te le iloa pe i ai se fee a le vaega lea pe leai, ae afai o le vaega lea, e mafai ona aumai i luma o le Palemene tagata, o kamupani ma Matagaluega ia e alu i ai ea malulu ia? Ae e fia foi ea malulu o lo o alu i tagata taitoatasi ia aua leaga e i ai tagata taitoatasi e le o ni kamupani o lea e tufa i ai ea malulu ia. Ia manatua foi.....

FOFOGA FETALAI: Malie le sui usufono mamalu, se i tuu atu le avanoa i le faamalamalamaga a le Afioga i le Minisita.

Tulai mai le Minisita mo Punaoa Faanatura ma le Siosiomaga.

Tofa Hon Faamoetauloga Lealaiauloto Ulaitino Faale Tumaalii: Faafetai lava i lau Afioga i le Fofoga Fetalai mo le avanoa.

O le tulaga tonu lava lena o lea e i ai le poloketi lenei. O tagata nei o Matagaluega ma Faalapotopotoga nei na filifilia faapitoa e tau o le focus group e fai ai le study lea. O le tulaga tonu lena ma e leai la se tulaga e faapea ua ave e aunoa ma se aoga. O lea e faaoga le group lea e fai ai suesuega, ma o lo o fai foi le tulaga lea o lea e i ai uma lava le lisi o e na ave i ai ea malulu nei.

FOFOGA FETALAI: Malie lau Afioga i le Minisita se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaioi: Lau Afioga i le Fofoga Fetalai, sa ou talatalanoa i le Afioga i le Minisita i le latou faiga lea i fesootaiga ma i latou e omai e fai i ai le polokalame lea. Sa ou tuualalo i ai, se a aumai ea ni mea faapena i le tulaga i ni faataitaiga, ailoga e maua se 80,000 o ni aiga i Samoa? Aumai aiga uma lava e fai ai faataitaiga ae aua le filifilia na o ni aiga, ae fai i aiga uma lava ina ia aua ne i tilofia ai se polokalame ma faapea ai foi ua fai na o ni nai tagata ae le aafia ai le atunuu atoa. O lea o le a tau vaavaai i ai pe i ai ni polokalame faapena e aafia uma ai le atunuu atoa. Aua a fai foi se polokalame faapena, e muamua lava foi tulai ae le sui usufono mo Faleata Sasae e fesiligia la outou mataupu. A o le taua ia o le mataupu lenei i mea o faataitaiga i tamai atunuu faapenei e toa gaogao. A toe i ai ni mea faapea, se aumai ia cover uma ai aiga o le atunuu atoa ma le masalosalo.

FOFOGA FETALAI: Tulai mai le sui usufono mamalu e faaauau le saunoaga.

Tofa AVEAU TUALA LEPALE NIKO PALAMO: E le augofie foi le faalogologo atu i le faapea mai o poloketi mea ia. E le tau sailia foi ia mea, o lea ua leva ona iloa e le SROS ma le Vaega a le Environment le taua o le

vaega lea, aua o lea o energy efficient vaega ia, ae sa i ai le manatu ona o le sao o le atunuu na fai ai i totonu i ina, o le a le mea na le tufa mai ai i fale o faifeau, o falesa ma vaega uma faapena? A o lea e maua le tala e tai 30 tai 40 ea malulu a isi. O le mea lea ou te fesiligia ai lea vaega ona e matua le fetai, ae ui i lea o le a taatia maia.

FOFOGA FETALAI: Ou te masalo o lea ua saunoa le Minisita, e le uma ai tufaga ea malulu faapea aua masalo po o le masina foi lea toe taunuu nisi ea malulu ona faasopolia lea o le atunuu e pei ona saunoa le Palemia, ae tulai mai le sui usufono mamalu e faaauau mai le saunoaga.

Tofa AVEAU TUALA LEPALE NIKO PALAMO: Ona ou oo mai ai lea i le vaega lea a le Immigration. Ou te fia talanoa i le faatinoina o visa o tagata e fia malaga ai i Ausetalia, ona o le vaega lea e matua faigata tele toe taugata tele i totonu o lo tatou atunuu.

Ou te masalo e leai ma se isi aua e i ai foi malaga a le Malo na o ma taumafai e fai visa ia ma e faigofie le ui atu iinei i lo tatou Ofisa, ae talofa e i lo tatou atunuu ona o le vaega lea. Ou te fia fesili atu i le vaega lea pe aisea ua le mafai ai ona faatino galuega nei i totonu i le Ofisa o Ausetalia lea e i totonu o lo tatou atunuu? O lea foi e faafogafoga mai le Ofisa o Ausetalia, ua matua faigata tele le faiga o visa tatou te o ai i Ausetalia. E tataua ona toe tagai ane i ai i le vaega lea ona e fai sina taugata.

FOFOGA FETALAI: Malie le sui usufono mamalu se i tuu mai le faamalamalamaga a le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai o itu ia e pule lava le atunuu latou, a o mea nei sa fai foi i Samoa nei, ona aveese lea ma iinei ae ave i Fiti. Sa ou fesiligia ma e le faatasi foi ona matou feiloai, ae sa aumai pea o latou finagalo, e faapea o le faiga faavae lea a le latou Malo. E le i tau maia le mafuaaga ae ua ou iloa lelei lava le mafuaaga. O le mafuaaga ua toeitiiti lava miliona le aofai o tagata i Fiti. O lona uiga e le laitiiti ifo i lalo i le 100,000 tagata e malaga i o i Ausetalia mai Fiti. A o tatou i le mea lea sa i ai, ailoga e atoa se 50 i le 100 tagata o tatou e malaga i Ausetalia? Aua o le tóatele o tatou e o agai i Niu Sila. O lea la ua fua atu e latou, e gau ai le latou ofisa iinei ona e tau leai nisi e o. O le tulaga lena na fai ai le latou suiga lea ma ua fai sina leva. Ua ave le latou vaega lea i Fiti ona ua fiu lava latou e tauanau e oo lava foi i le Palemia, e faafogafoga foi le Palemia ia ia i latou, ae a avatu loa fuainumera ia, o i ina tonu lava e faavae ai aua e tautala fuainumera.

O le itu lena o lea e fai ai sina ou inaina i le polokalame lea i aiga fuafuaina. O lea la ua taofiofi ai lava o tatou tagata i le 180,000. Ua ou le iloa pe ua atoa ea le 30 tausaga o lo o tumau ai lava i lea fuainumera. Na o le tau saviligia atu lava o le sakete o le loomatua tu ma fai mai, “A, manatua le aiga fuafuaina.” O le a la le mea o le a fai? O lea tatou te aiga fuafuaina ai lava. E aafia ai foi ma le tatou lakapi, e aafia ai a tatou netball ona e utiuti tagata tatou te filifili mai ai ona o nei mea o aiga fuafuaina.

E fia sau fanau o i ai? (*I le sui usufono mo Faleata Sasae*). Masalo o oe foi le isi o lo o le lava lou sao. O le a faamoemoe fua la ia Ausetalia o lena e le lava lou sao ina ia toso mai ai le mataupu lea i Samoa nei?

FOFOGA FETALAI: Ua maea le taimi o le sui usufono mamalu. Tulai mai e faaiu mai le saunoaga. E maua isi ou avanoa i mea taitasi ma le auiliiliga.

Tofa AVEAU TUALA LEPALE NIKO PALAMO: Lau Afioga i le Fofoga Fetalai a o le i faamaeaina lau tautalaga, ou te fia talanoa atu lava i le Ofisa o Aoga.

O le a tonu lava le mea ua oo i le Aoga o le Kolisi o Samoa ma Avele? O le mea lea ua tupu, o lea ua fai lava le suega faapitoa mo aoga ia e lua ma o lea foi ua totogi le tupe e sue ai le tamaitiiti i aoga ia. O le mea na sau ai aoga ia a le Malo, o le mea lea na finau atu ai le Vaega Faaupufai lenei i le system lea ua faatino nei. O lea la ua faatino o lea ua le maua se avanoa o fanau uma lava a le atunuu lea sa i le Year 8 ona ua eseese avanoa i ina. Aua e pei o i ina sa faatauva ai aoga. Pe toafia e o i le Kolisi o Samoa ae toafia e o i Avele. O lea ua faamalolo Vaipouli i lalo o le polokalame, a o lea ua toe fai le vaega lea ua toe fai le suega e au ai i le Kolisi o Samoa ma Avele. O le fesili, aisea ua faatino ai lea vaega?

FOFOGA FETALAI: O le a tali atu le Minisita. Tulai mai lau Afioga i le Minisita e saunoa faamalamalama.

Afioga Hon Magele Mauiliu: Faafetai lava mo le avanoa lau Afioga i le Fofoga Fetalai. O fuafuaga a le Malo e le o ni fuafuaga na fai ananafi. O fuafuaga ua leva ona faataatitia mai, ou te masalo o lea foi e silafia e le sui mamalu le avatu lea o aoga ma faaleleia aoga i tua e le gata o aoga tulagalua ae faapea ma aoga e i ai kolisi ina ia taofiofi ai fanau ma alo o le atunuu i le malaga mamao mai i Apia ma tutupu ai isi faalavelave e le tatau ona oo i ai fanau.

E le o se mea faigofie foi aua sa ou aoga foi au i Apia, e le o se mea faigofie le omai nonofo i aiga ese i Apia. O le mea lea sa fuafua e le Malo, pau lava le fofu o le mea lea ia faamalosi mai a tatou aoga i tua. O lea la ua faasavali lava le polokalame a le tatou Malo, ma o lea foi ua mautinoa le malolosi mai o tatou aoga, faatasi ai la ma le tuu atu o tatou aoga i tua e pulea e mea o trust po o Komiti o Aoga. O lo o faapena foi ona faasavali lenei polokalame. Tapuniga o Vaipouli, na ala ona tapuni Vaipouli o le aoga e tasi a le Malo i Savaii, ona o la e ua i ai le Kolisi o le Itu o Tane Nu.1 e latalata foi i Vaipouli, ma ua matauina foi ua o i ai le toatele, ua pau i lalo le numera o Vaipouli, e \$4miliona latalata i le \$5miliona sa faatino ai lena aoga in a tausaga, a ua pau i lalo le fuainumera o tamaiti. O le mea lena na oo ai ina tapunia lena aoga ae faasolo ane tamaiti e aoga i o latou itumalo. Ma ou te talitonu o se mea lelei tele. E faapena foi la fuafuaga lea ua oo i ai Avele ma le Kolisi o Samoa, o lo o faasolo foi talatalanoaga, o se taimi foi tuu atu na aoga i tua e pulea i tua e Komiti, ae avatu lava e le Ofisa o Aoga le curriculum o faiaoga.

O le tulaga i a tatou suega, na toafia le suega lea o le Year 8, ua matauina, na pau lava le agaga na fai ai lenei suega, e sue ai tamaiti popoto lava o Samoa e o i le Kolisi o Samoa, tamaiti e pito atu i ai le popoto e o i Avele, ia, o tamaiti e vaivai o ane i Leifiifi. O se mea o le faailogalanu lena mea, ua elitist tele lea faiga faapea. A ua oo lava i le taimi foi lele ua tauloto e tamaiti mataupu ae le o malamalama ina ia maua ai le avanoa e o i aoga nei. Ae

silafia e le atunuu, e le faapea ua tautaua le Kolisi, leaga o tamaiti lelei uma lava lea e i ai. A o le mea lea e taumafai atu ai le Malo, o le actuary access ia tutusa uma le maualuga e oo i ai aoga. O lea la ua i ai le manatu, aveese le suega lea o le Year 8 e pei ona masani ai lea e tauva ai, ae ia fai lava le suega ia e fua i mea o matatia ua uma ona faataatitia e le Matagaluega o Aoga e fua i ai le tomai ma le level o le tamaititi e i ai, ma ia alu lava le tamaititi ia i lana aoga, o lea la e kick in faatasi ma tatou mea ia o zone, lea la ua toe aumai, e le fou foi le zone ia, na amata mai lava i le faaiuga o le 1990, po o le 1998 ea po o le 1997 na amata mai ai, ae o lea ua tatou toe foi lava i ai, ona e o faatasi lava mea ia, e o faatasi lava le faamalositia o tatou aoga i tua ma le faamalositia o le zone ina ia nonofo ai lava tamaiti ia i ina. Ia nonofo lava tamaiti popoto ia o Faleata i Faleata, nonofo tamaiti popoto i Savaii ina ia galulue faatasi e lifi le standard, ae le o le omai fua e tautaua ai le Kolisi o Samoa, ae leai lava ni mea o i le Kolisi o Samoa ia. O le suega la lea ua fai nei, ona e le i maea le define ina o zones, lea la ua i ai loa le manatu, se i toe fai lava le suega lea mo e lava o la e naunau e fia o i le Kolisi o Samoa, se i o i ai mo le tausaga lenei e tasi. I le faaiuga o le tausaga ua uma tatou zone ia, ona tatou faapea lea, o le isi vaega o le zone lea e o i le Kolisi o Samoa. O le isi zone lea o outou i i, o lea foi e tilotilo i le mea o le shared zones a e felavasai zone, o lena foi e tilotilo i lena mea ina ia maua ai la le tulaga lea e i ai, e le toe i ai ni suega i aoga ia, o i latou lava e i le zone lea, agai i le Kolisi, o i e o i Faleata. O le taunuuga o ia mea, ia lelei uma lava aoga, aua ne i faapito i se aoga e tasi, e nonofo alo ma fanau i le mea e nonofo ai, mafuta ma matua, leai ni faalavelave e tutupu ai, ma fesoasoani matua i aoga. O lea lava ua atagia i suega le mea lea e taumafai atu ai le Malo, ua manaia lava a tatou suega mai tua, amata mai lava i lalo i le primary school. O le Year 8 lea na fai ina ua sui le faiga, o le tamaititi lea na sili ina ua sui le faiga, o le tamaititi Savaii. Ia ua outou vaai i ai i le manaia, ua aveese le suega lea na fai e filifili mai na o le au popoto e o i le Kolisi sosoo atu ai ma Avele, a o le mea lea ua i ai, o lea e taumafai ia popoto uma fanau a le atunuu, tuu le au popoto i Savaii e atiae uma Savaii, aua le toe omai fua i i e tautaua ai le Kolisi o Samoa.

Ia, o se faamalamalamaga lea faafetai.

FOFOGA FETALAI: Malo faafetai. O lea ua malamalama le folasaga a le Afioga i le Minisita, ua maea lou taimi ae tulai mai e faaiu mai le saunoaga, ua tatou tulalata foi i le tatou taimi malolo.

Tofa AVEAU TUALA LEPALE NIKO PALAMO: Faafetai i le Afioga i le Minisita mo le faamalamalamaina o lea vaega, ae masalo foi e le o se vaega fou o le vaega ua leva ona faataatia mai, ma e talia foi e le sui usufono le vaega lea, ae pei o le agaga lea na ala ai ona fesiligia le vaega lea, po o le a tonu le mea o le a oo i ai aoga ia aua o lea ua toe fai suega. O lea ua saunoa le Afioga i le Minisita, e i ai lava lou lagona, e tataua ona aumai le tamaititi lea na sili i le Year 8 e ave i le Kolisi.

FOFOGA FETALAI: Malie le sui usufono ua uma lou taimi.

Tofa AVEAU TUALA LEPALE NIKO PALAMO: Avea ia lenei avanoa e momoli atu ai le faafetai tele i lau Afioga i le Fofoga Fetalai, e ui lava ina utiuti le taimi ae i ai nai vaega ia e fia talanoa ai, ae momoli le faafetai i lau

Afioga i le Palemia ma le mamalu o le Kapeneta mo galuega, aemaise foi sui usufono mamalu o Ofisa taitoatasi, Susuga i Alii Pule ma Tamaitai Pule o Matagaluega ma Faalapotopotoga, malo lava le galulue, o lea ua manuia le tatou Malo i a outou galuega. A i ai foi se faamatalaga ua sala i la outou faafofoga, ia malu ave i fale so outou finagalo, o motugaafa lava ia a Faleata Sasae. Ia manuia le tatou Fono.

FOFOGA FETALAI: Malo faafetai i le saunoaga a le sui usufono mamalu. Ona o lea ua tatou taunuu i le tatou malologa masani o le taeao, o le a faataatia ese Galuega o le taeao mo lana malologa masani o lenei taeao.

Na faataatia ese Taualumaga a le Fono Aoa mo lana malologa masani i le itula e 10:45 i le taeao ma toe faaauau i le itula e 11:26 i le taeao.

FOFOGA FETALAI: Ou te talitonu o lea ua maea le palega auau o le taliga o le sua i lenei taeao. E momoli atu le faamalo ma le faafetai i le paia ma le mamalu o le tatou Maota, ou te talitonu o lea ua tatou taunuu i le vaega lona lua o lenei aso. E pei lava ona faatalauula atu i le taeao ua sola ma le itula analeila, le paia e o le tatou Maota Fono, e manumanu tele i le tatou taimi ma le faatulagaga o le tatou galuega. E tatalo atu ai pea ina ia lava faapalepale i tuleiga ma saunoaga, aemaise foi o le taoto tonu i le ogatotonu o le moa o le ala e ala i le tatou Tala o le Tupe e manino ma malamalama ai foi tulaga o le taumafai mai o saunoaga a sui usufono mamalu ma le taumafai foi o le tatou Malo e tali atu.

E faia le tatou malologa ua maea ona saunoa le sui usufono mo Faleata Sasae, ia, ma e toe tuuina atu le avanoa lenei i se sui usufono e toe fia saunoa. Ia, tulai mai se tasi o sui usufono mamalu mo Falealili, Tofa Tusa Misi Tupuola.

Tofa TUSA MISI TUPUOLA (Falealili): E momoli atu le agaga o le faafetai tele i lau Afioga i le Fofoga Fetalai mo le avanoa foi o lenei sui usufono o lenei itumalo. E momoli atu foi le faafetai i lau Afioga ma le mamalu o le Matagaluega o le Ofisa o le Fono, o lea ua palega auau le taliga o le sua i le malu taeao i le Afioga i le Palemia ma le Kapeneta aemaise o le mamalu maualuga o le Palemene i lenei taeao aua foi se faamalositino i feau o totoe o lenei taeao ma le aso.

A ua ou tulai atu lau Afioga e fia fai foi se manatu puupuu o lenei itumalo i le tatou Tala Faatatau Faaopoopo o le Tupe e pei ona taatia nei i le Laulau a Fono. Lau Afioga, masalo o lea ua maea ona paelago paia ma sa ma faigata o le atunuu, aemaise foi le maualuga o lenei Palemene o le Fonousu a le atunuu, ae ou te manatu o le a le toe oo i ai se matou faamatalaga. Ou te fia faatalofa atu i le paia o lou itumalo o Falealili, le paia maualuga i le afua mai i Tapulolou i Sasae seia paia Iliili i Sisifo, o le paia lava lea aua le Alaalagafa ma la oulua nofo a Tulafale ma le Tauagaeseese ia te oe Falealili. Malo le tapuai, malo foi le soifua maua ma le lagi e mama ua tatou aulia mai lenei tausaga fou i le alofa ma le agalelei o le tatou Tama o i le Lagi.

Ou te faatalofa atu foi i le paia maualuga i le tapuaiga a le Aufaigaluega Paia i lau Susuga i le Toeaina Faatonu, Susuga Tunumoso Iosia ma le Faletua

ia Susana, faapea foi le Failautusi o le tatou Pulega i Falealili, Susuga Amosa Vaetoe ma le Faletua ia Punipua, aemaise o le paia maualuga i le Aufaigaluega Paia a le Atua ma o outou Faletua i so o se fatafaitaulaga i totonu o le tatou itumalo. Malo le soifua maua, malo le folau, o lea ua tatou aulia mai lenei aso o le amataga o le tausaga fou, ia tatou faafoi pea le viiga ma le faafetai i le Alii. Malo le tatalo, faafetai foi i la outou tapuaiga ua manuia ai faiva o sui usufono o le tatou itumalo i le Afioga i le Minisita aemaise foi o lou sui usufono faatauvaa, e tusa o feau ma galuega ua totofi ma galulue ai i totonu o le Palemene o le tatou atunuu.

Ae ua ou tulai atu ma le faaaloalo i lau Afioga, o Falealili lava ia e lagolago i so o se mea. O le Tala Faatatau Faaopoopo foi o le Tupe, e lagolagoina lava e lenei itumalo, ma ou te talitonu ma manatu le itumalo, e le o lava ia Tala Faatatau Faaopoopo. E tele ma anoanoai mea o lo o manaomia e Matagaluega ma Faalapotopotoga, ae ua tatou faia lava le upu e masani ai, o le a fua lava le ofu i le fasi ie e mafai ona tatou fuafuaina, aua foi le faamaeaina o lenei Tala o le Tupe pei ona tatou pasia i le tausaga ua tuana'i.

O tulaga uma la pei ona tulai mai lau Afioga ma le mamalu o le Palemene, e lagolagoina lava e lenei itumalo fuafuaga uma. Na pau lava nai mataupu laiti ou te fia oo i ai lou sui usufono, ona o le tulaga lava ua tulai mai o le tumutumu o le tatou taulaga i lenei vaiata, aemaise o le tele foi o nisi o faalavelave ua tulai mai e aafia ai meatotino a le atunuu, e pei foi o lea ua aumai i totonu o le Tala o Tupe le tulaga i le tele o nisi o faalavelave o lo o tulai e aafia ai taavale a le tatou atunuu po o le Malo. O lau fautuaga ma le tuualalo a lenei itumalo, pei o lea ua vaavaai atu ua le toe faia foi a tatou polokalame faaleaoaoga o mea o avetaavale. O le defensive driving course sa amata lava ona tatou amata mai ai, ma maua mai ai si suiga laititi o uiga o avetaavale, ae pei ua tuai foi ona toe fai, ua toe foi lava foi la i le mea tuai. Na o se fautuaga ma se tuualalo a lenei sui usufono, e talosagaina ma le faaaloalo a outou Afioga i Minisita o le Kapeneta, ina ia toe faaauau pea ona toe fai la tatou polokalame lea, aemaise o Ofisa Sili o Pulega i lalo o la outou vaaiga, ina ia faamalosi pea le toe faia e le LTA o a tatou polokalame ia, aemaise lava le tulaga o le faatinoga o a latou galuega i taimi pisi aemaise foi o le taimi vevesi ua i ai, aemaise foi o lenei tausaga ua tatou amatalia.

Ona oo mai lea o sau faamatalaga i le tulaga o le asu, le malosi o le smoke emission, lea ua tatou vaavaai i luga o auala tetele, ona ua fatupulaia pea le tele o taavale afi, o si au fautuaga lava ina ia maua pea fesoasoani, o lea ua ou maua se faamatalaga e faapea ua le toe maua se fesoasoani mai nisi o Faalapotopotoga sa masani ona latou faatupeina polokalame nei, o le aumaia lea o masini nei e mafai ai ona pue le asu, aemaise foi le faatupega o nisi o a latou polokalame pei ona ou talanoa atu ai i le amataga i le tulaga o le faatinoga o polokalame ia lau Afioga ma le faaaloalo, ae tatau lava ona toe maua nisi seleni mo le faatinoga o galuega ia a le Pulega o Felauaiga i le Laueleele, aua lava le faaleleia atili o tulaga ia pei ona aafia tele ai si o tatou atunuu i le kasa oona lea o lo o maua mai i afi o taavale afi. E le gata la i lea lau Afioga ma lou faaaloalo, a o le tele foi o nisi o avetaavale pei e le o lelei, e le o lava ma atoatoa lo latou silafia i le avetaavale i luga o le auala, na o le tutupu mai ai o faalavelave ia e tulai mai.

Ona ou oo mai ai lea lau Afioga, na ona toe faamanatu atu i lau Afioga i le Minisita mo Punaoa Faanatura ma le Siosiomaga, sei toe silasila ane i le talosaga a lenei nuu na avatu lava i le 2011, a o lea o le a uma le tatou

Paeaiga ae le i maua lava se tulaga o i ai, a ua aafia tele lo matou laueleele foi i le vaega o lo o i ai le vaiinu o lenei nuu, o le a amata ona aafia i le maualuluga o le sua o le tai.

Ia, pei na o le pau ia o nai mataupu lau Afioga ou te tulai atu ai, a o le tulaga o le Tala o le Tupe, ua lagolagoina e lenei itumalo. Ia manuia tele le Fonousu a le tatou atunuu, ia manuia foi le sagai atu i fuafuaga totoe o lenei Fonotaga a le Palemene. Ia manuia tele le tatou Fono. Soifua ma ia manuia.

FOFOGA FETALAI: Faafetai saunoa i se tasi o sui usufono mamalu mo Falealili, Tofa Tusa Misi Tupuola.

Ia, ua avanoa le tatou Maota mo se isi sui usufono e fia saunoa. Ia, tulai mai le sui usufono mo Aleipata Itupa i Luga.

Tofa FAGAAIVALU KENRICK SAMU (Aleipata Itupa i Luga): Faafetai atu i lau Afioga i le Fofoga Fetalai e tusa ai foi ma le avanoa ua tuuina mai mo lenei itumalo o Aleipata Itupa i Luga e taumafai atu ai se sao puupuu i lenei Tala Faatatau Faaopoopo o le Tupe.

E muamua lava ona ou faatulou i le Maota nei i Tiafau, o le malae o le faautugatagi a le atunuu, i le afio o lau Afiogai le Palemia ma le mamalu o le Kapeneta, aemaise o sui usufono mamalu uma o le Fonousu a le atunuu. E faatulou atu foi i lau Afioga i le Fofoga Fetalai, aemaise foi o le Taitai o le Itu Agai ma le mamalu o lea foi Itu o le Maota.

Ou te faatulou atu foi i le paia lasilasi o Faauluuluga o Matagaluega i tupu ma ee, aua e le faagaloina lava la outou tautua tuavae o lo o lima ma vae i ai lo tatou Malo aua se manuia o Samoa ma ona tagata. O le a ou le toe faloina le afaloloa i le paia o Samoa o faafofoga taputapu mai, ae avea ia lenei avanoa ou te faatalofa atu ai i si ou itumalo pele o Aleipata Itupa i Luga, mai Ulutogia, Vailoa ma si ou nuu o Lalomanu. I le afio o lau Afioga i le Tuiatua Faanofonofa, afifio le Falefia o Alii, afio Amituanai o le Maopu o le Tuiaana, susu i laua Suafa, lo outou toafa o Tootoo, le Igoamatua ma le mamalu ia Saleaamua. Afio foi lau Afioga i le Sao Fetalai, afifio le Falelima o Alii ma Alaalamalae ma le mamalu ia Tualemoso ma Saleleaalii. Susu le Susuga i le Sagapolutele o le Tama a le Malo, afio le Matua ia Falanaipupu, le Taofia ma le Usoalii ma le mamalu ia Saoluafata. O paia ia o si ou itumalo o lo o ou tiu ai i upufai o le atunuu.

Si ou itumalo e, tapuai maia ae se i ou taumafai ane aua se manatu o le tatou itumalo aua lenei Tala Faatatau Faaopoopo o le Tupe.

Lau Afioga i le Fofoga Fetalai, e muamua lava ona momoli le faafetai i le Minisita o Tupe po o le Afioga foi i le Palemia e tusa ai ma lenei Tala Faatatau Faaopoopo o le Tupe, aemaise foi o le Ofisa Sili o Pulega o le Matagaluega o Tupe ma Matagaluega taitasi sa faapena ona gapatia i lenei Tala Faatatau Faaopoopo o Tupe aua le faaauauina o galuega ma atinae faauma o lenei foi tausaga faaletupe.

E avatu ai foi le lagolagoina e lenei itumalo o lenei Tala Faatatau Faaopoopo o le Tupe. Ma e faamauina foi i lenei vaega o le taeao e fia faamanatu atu foi i le mamalu o le tatou Malo i le mamalu o Minisita nisi foi o talosaga ma nisi foi sa tatalo atu ai. O le a le aofia lava le tele o le Aiga Kapeneta, ae o nisi lava o le Aiga Minisita o lo o i ai nisi o talosaga tuua mai lenei itumalo, aua o le tolu lenei o tausaga o lou nei tootoo i Tiafau nei, o

taumafai lava... e le gata i talosaga tusitusia, a o le faaleo foi o la e faafofoga mai le itumalo.

Ia lau Afioga i le Minisita mo Galuega, atonu o lau Afioga o lea e tele ai nisi o manaoga o lenei itumalo, i nisi foi o vaega e fia faaleleia. A o le i avatua ni manaoga ma se faamanatu, e muamua lava ona momoli le faafetai i lau Afioga aemaise o le Malo i nisi o atinae ua uma ona faataatia i lenei itumalo, aemaise o le auala, e le o toe po malae i le auala e agai atu i Samusu seia paia Lalomanu, o se auala aupito sili lea ona taua mo lenei itumalo i lenei foi vaitau o le soifua ma le ola. O lea e momoli tele atu ai le agaga faafetai, o lea foi lava ua faagasolo galuega, ou te talitonu po o le amataga o lenei tausaga ua faapena ona faamaeaina ai lenei galuega tele. A o nai a matou talosaga lava pei ona tuua, o nisi foi o matou auala. Ia na ona tuu atu lava, a o lena e i ina le tofa fetalai i lau faasoa tau utiuti i le tele lava o talosaga a lenei Maota ma le tatou atunuu, o lo o faapena ona tuuina atu i lau Afioga.

Ona ou oo mai lea i le tulaga tau suavai, o le faafitauli masani lava, ae pei lava ona taatia atu, o le tele o lenei itumalo ua agai i uta i nofoaga maupuepue. E tatalo atu ai i lau Afioga, o la e sologa lelei lava le tatou vai, se i vagana nisi o taimi e faaletonu ai ona faaoga lea o tatou loli vai. Na pau o lea, ae na ona faataatia atu, manaia foi le auala fou lea ua i ai ae faataatia ai ma se paipa, e pei e faigofie lea i le vaavaai i tua i le tulaga ua i ai le tatou auala. Ae faafetai lava mo le suavai, o nisi o taimi e faaletonu ai, a o le auunaga lava a le tatou loli vai, o lo o faapena ona lelei.

Ona ou oo mai lea i le Malosiaga Faa-Eletise, malo lava, atonu foi o le tulaga o i ai a matou moli auala, o le tele o moli auala ua le o toe ola, ae tatalo atu lava ma le agaga faaaloalo, o le vaitaimi o le kerisimasi ma le tausaga fou, sa tumutumu foi lenei tafa o le atunuu i Malo aemaise foi o tagata tafafao mai fafo, ae o lo o pepe lava matou moli. Sa faafesootai atu lava le Ofisa ae tali mai ua lelei, ae peitai ane, o lea ua goto atu le tausaga fou e le i ola lava o matou moli auala.

O o matou taligalu o lena ua taatia atu foi le talosaga, a o le tatalo lava i o matou taligalu i lalo i le vaega tonu lea sa i ai le pitonuu o si o matou nuu i Lata, o le taligalu fou lava sa faataatia i le taimi lea a o le i aafia i matou i le tsunami. Pe le mafai lava ona toe agai atu se masini e toe amata ona toe laulau mai le maa o lo o faapena ona...ma toe tau faufau ai le taligalu. O lea ua amata ona toe agai atu tagata e toe nofoia le nofoaga lea. A o le aotetele lau Afioga i le Minisita, faamalo galue, faamalo foi le faasoa e ui lava ina tele tausaga ae talitonu lava e fai aso pea le Alii.

Lau Afioga i le Minisita o Siosiomaga, faamalo i lau Afioga, o le taligalu lea sa fai atu ai mo le alu lea i tai i Tapaga, na ona tatalo atu lava ma le agaga faaaloalo i lau Afioga, sei silasila ane i le taligalu lea, ma le lona lua o le loli lapisi, e tasi lea vaega e pei o le a fai ma tuga i lenei itumalo, ona ua le lelei lava le aoina o le lapisi ae ua tele ogaeleele o lo o faapena ona o atu tagata ma lafoai ai le lapisi i le taimi o le po, aemaise o lea ua malosi le atinae tau turisi.

FOFOGA FETALAI: Malie le sui usufono o saunoa se i avatu le avanoa ona o lea ua taua le Matagaluega. Tulai mai lau Afioga i le Minisita.

Tofa Hon Faamoetaulua Lealaiauloto Ulaitino Faale Tumaalii: Faafetai i lau Afioga i le Fofoga Fetalai mo le avanoa. E tasi le mea e fia malamalama ai lou sui usufono o le taligalu lea e taua po o fea tonu lava le taligalu lea, aua

o lea e tau mai le isi taligalu e agai i le pitonuu lea i Lata, ao fea la le isi taligalu lea e aumai ai le talosaga lona lua lea.

FOFOGA FETALAI: Tulai mai le sui usufono.

Tofa FAGAAIVALU KENRICK SAMU: O le taligalu lea e taua, o le alu lea i tai i Tapaga, aua e pei o le taligalu lea e fitoitonu i le Matagaluega, ae sei vagana ia Lata e pei o i sa faapena ona faatinoina e le Matagaluega o Galuega. O le tulaga lava i le lapisi, o le talosaga masani lava a lenei itumalo, pe e le alagatau lava ona fuafua se tatou lapisi i tua i lea foi itu o le atunuu e faafaigofie mo le atinae tau turisi e lafoai ai le tele o le lapisi, aua sa i ai foi taimi sa agai atu le Matagaluega ma tau fuafua le vaega eleele mo le faamoemoe lea. Ae na ona toe tatalo atu ma le faaaloalo po o le a se tulaga o i ai. Ae momoli tele atu le faamalo ma le faafetai i le tele foi o galuega ma le tau faasoasoa i nisi foi o talosaga. Lau Afioga i le Minisita mo Aoga e momoli atu le faafetai tele a lenei itumalo e tusa ai foi ma le kolisi ua faavaeina i Aleipata po o le kolisi o Aleipata, o le tausaga nei e toa 6 a matou tamaiti o le a ulufale atu i le Iunivesete, e lagona lava foi le faagaetia, o le tausaga muamua lea na tea atu nei, o le tausaga muamua lea o le kolisi o Aleipata, ao le tatalo a lenei tootoo sei alofagia ni nai faiaoga, e pei o nai vaega ia o lea e tau faaletonu, e pei o le tele o tamaiti ia ua faamanuiaina i le Iunivesite e pei sa agai mai i inei i Apia e fai a latou aoga afiafi, o lea la ua faapena ona faamanuiaina. Ia o le tatalo ia alofagia nisi faiaoga e faasoa atu aua lava le tauleleia o le.....

FOFOGA FETALAI: Malie le sui usufono o saunoa se i tuu atu le avanoa i le Minisita mo Aoga, Taaloga ma Aganuu. Tulai mai lau Afioga.

Afioga Hon Magele Mauiliu: O le fia malamalama mo le tali atu mulimuli. O lea e manaomia ni faiaoga. O a ituaiga faiaoga? O a mataupu? Faafetai.

FOFOGA FETALAI: Tulai mai le sui usufono mamalu.

Tofa FAGAAIVALU KENRICK SAMU: Faafetai lava i lau Afioga, e pei o lau tau faalogologo atu i ai i le komiti o Aoga e pei lava o mataupu o le Igilisi ma le Faasaienisi, e pei o faiaoga ia e manaomia tele ia matou i tua. Ona faamuliai lea o se leo o lenei tootoo, e faamauiina foi le faafetai i lau Afioga i le Minisita o Leoleo, Falepuipui ma Tinei Mu o lo o faapena ona ou galue i lalo o lau Afioga, ia faamalo, faamalo foi i le Ofisa o Leoleo mo le tatou tiute mo le saogalemu i taimi o aso fiafia, e lagona lava le fiafia i lo outou tautiga e ui lava ina ao ma le po ae na talitonu sa faatino lava o outou tiute, aua lava le solo lelei ma le saogalemu o lo tatou atunuu i ia foi vaitau. O lea e momoli atu ai le faafetai i lau Afioga i le Minisita ma le Pulega o Leoleo aemaise le loaloa o le Matagaluega aemaise foi i le matou ofisa o le Fuimu, le Alii Pule ma le Ofisa, ia faamalo le galulue i lona tausaga. O a foi ni mea sa faaletonu, e manaia foi lenei tausaga e toe matimati ai, aua le tatou sao mo le tautuaina o le tatou atunuu. Ao lau tatalo lau Afioga i le Minisita o lea lava e talosaga atu lava ma le agaga faaaloalo le matou fale lea e nonofo ai leoleo i Lalomanu, e pei ona ou taua o le fale, o le fale tuai o le fale sa

faaaogaina e tamaitai tausī soifua i aso ia, o lea ua faaaoga e malu o le Malo, a tetele timuga e pei lava ona ou taua e alu le vai i totonu o le fale, o lea e talosaga atu ai i lau Afioga se i silasila ane i le vaega lea. Lau Afioga i le Fofoga Fetalai, o talosaga na a lenei itumalo ua toe faamanatu i lenei taeao, ia o le toaga lava e tuitui e tatala mai le faitotoa, atonu lava o lea ua alu le fa lenei o tausaga talu ona.....ao lenei lava e tuitui. O se sao lena o lenei itumalo, ae ia alofagia e le Atua lau Afioga i le Fofoga Fetalai aua le faatonufofoga o le Fonotaga a le atunuu, ia faamanuia foi i le Malo aemaise le Taitai o le Itu Agai aua foi le lipoiina o upu a le atunuu, faamanuia foi i Ofisa Sili o Matagaluega taitasi i tupu ma ee aua foi le tautuaina o si o tatou Malo e ala i tiute ma faiva.

FOFOGA FETALAI: Malo, faafetai saunua i le sui mamalu mo Aleipata Itupa i Luga. Ao lei avatua le avanoa i se i si sui usufono e toe fia saunua, o lo o i ai le polokalame a le Ofisa o Faiga Palota o lo o faagasolo i le aso lenei e tusa ai ma tusi na tuuina atu e fia pueina uma o outou ata ao loma ai le faigapalota tele a le atunuu o polokalame masani e fia faaleleia e tapenapena ai le faamoemoe, ma o lo o i fafo ia sui o le ofisa, o ai lava e avanoa, e le atoa se lua sekone pe tolu sekone faatinoina ai le faamoemoe, ae ia tatou lagolago ona o le galuega fai a le Ofisa o Faiga Palota. Ia Matia ma Matia Ituau, e lelei le faasolo mai i le tou pito lena, o lena ua sooama mai le tou pito ona faagasolo mai lea i lea itu. Tulai maia.

Afioga TUFUGA GAFOALEATA FAITUA (Vaisigano Nu.1): Lau Afioga i le Fofoga Fetalai. Ia e le i sauni lenei Tootoo ae ua valaaulia. Ae ui i lea, e faatulou atu i le mamalu o le Fono Aoaofaitulafono a Samoa, lau Afioga i le Palemia, le Kapeneta faapea foi sui mamalu o le Fono usu a Samoa, faapea foi le Taitai o le Itu Agai, le Sui Taitai ma Minisita o lo o faaolioli mai tao i nai Minisita o lo o galulue i le la.

E avatu le matou faafetai i lenei Tala Faaopoopo (Nu.1) o le Tupe 2014/2015. E ui lava ina laitiiti na o le \$10+ miliona, ae lagona lava le faagaetia ona o le aotelega o lo o i ai le manatu o le Malo e faasaosao tupe faaalu aua lava galuega o totoe i lenei Paeaiga i lenei tausaga. E ui lava ina o le a toe oo foi ia Iuni i lenei tausaga, ae atonu o le a fetui lea ma manaoga na tuuina atu a o le i faia Faiga Palota o le 2016.

E pei ona i ai talosaga a lenei itumalo, o lo o ua uma ona fai galuega a le Malo, ua uma ona faataatitia e pei ona i ai auala galue a le Paeaiga talu ai i le nuu lea o le itumalo i Vaisala. O le Paeaiga muamua ua uma ona i ai auala galue, a o le manaoga faamolemole e fia i ai ni paipa, o se paipa e agai i uta i auala galue ia e lua, e le gata i le suavai ae faapea foi moli auala mo galuega faaauu pea i totonu o afioaga ma itumalo. E faapea foi i le nuu lea o Auala, ua uma ona toe fai i ai galuega a le Malo, ua i ai moli ma e manaomia le faataina. E pei ona ou lauga ai i le taimi ua fano, ou te masalo na amata loa lenei lalolagi fai loa le auala galue o le nuu lea. Ua matauina nei, e pei lava na pa ai se pomu, se i tulou lava le Palemene ona ua matua malepe lava.

O le ala lea ua i ai moli, ae manaomia lona toe faataina ia lelei le agai i uta aua lava le fofoga taumafa aemaise le tautuaina o le atunuu pe a lava le faasoa, faatasi ai ma le auala o le aoga tulaga lua a le nuu lava lea e tasi, masalo pe na o le 10mita pe 20mita e faapena ona manaomia le toe faalelei o le auala agai i le aoga tulaga lea.

Ona oo mai lea i si o matou nuu i Asau i aiga ma Salafai, e pei ona tatalo atu muamua sa i ai foi le auala ua uma ona faataatia e le malo le auala galue i Ogaala, ae tatalo atu i se paipa e alu agai i aiga ia, ua feoololo foi aiga ua nofoia uta e agai i ai le auala galue lea, ao le taimi nei o lo o asu vai pea, e matua manaomia lava ni paipa, faatasi ai foi ma le taligalu e pei ona avatu i le amataga toeitiiti lava afa le taligalu i le aia i le sami sei tulou, o lea la ua uma ona fai taligalu i le va lea o Asau ma Auala, ao le faalavelave la e i ai i le taimi lenei e auala atu ai le talosaga, o lo o pogisa, e tele le faaaogaina o le auala lea i le leva o le afiafi, a le faamalamalamaina le auala ua atili ai ona i ai nisi soligatulafono ma aafia mai ai le faamasinoga ma iu atu ai i Tafaigata, o le tatalo ua leva ona tuuina atu e ala atu i lau Afioga, e ui lava ina laititi le Tala Faaopoopo o le Tupe na o le \$10miliona, ae tuitui pea e pei ona saunoa lou uso a tuaoi mai Aleipata Itupa i Luga e tuitui pea le faitotoa o a outou Afioga, atonu lava e taulu taulu ona matala mai lea o le faitotoa.

E faapea foi i le auala lea e oso atu i tai i Utuloa lea e i ai le faletalimalo e pogisa foi le auala lea, e pei foi ona tatalo muamua i ni moli e faamalamalama ai, faapena foi i gatai ifo laititi o le uafu e pei ona ou tatalo atu, e i ai nai aiga na sa i ai iina na i ai le latou auala taavale, ao le taimi lenei ua alu ai le matafaga. Ou te masalo o le siosiomaga e ona le matafaioi lea, ae tatalo pea ma tuitui atu, e faapea foi i lau Afioga i le tamaitai Minisita, mo se fale faamasino mo lea itu o le motu, e faafaigofie ai foi le auunaga, ma le toe tau o mai i Tuasivi po o Apia nei, o le fesoasoani atu lea i le Tala o le Tupe, o la foi e faalogologo mai lou itumalo, lau Afioga toe tasi o lea ua galo ia te au, ma le TV, o lea ua latalata ona taaalo mai le All Blacks ma vae ia o le Fitu, e matamata matamata lava motu atoa mai, i lenei taimi ua tau leai se ata e maua.

O le talosaga lea a lenei itumalo e tusa ai ma lenei Tala Faatatau Faaopoopo o le Tupe.

FOFOGA FETALAI: Ia malo. Malo le tali valaau i lau Afioga i le sui usufono mamalu. O le nofo a Pule ia e sauni lava i so o se taimi, ae faafetai atu i le tuleiga ma le saunoaga.

Ia ua avanoa se isi sui usufono e fia saunoa. O lea o le a lafo i lea itu o le Maota, tulai maia lau Afioga i le sui usufono mo Sagaga le Usoga.

Afioga MUAGUTUTAGATA FAAMAUSILI AUIMATAGI PETER AH HIM (Sagaga le Usoga): Faafetai i lau Afioga i le Fofoga Fetalai mo le avanoa, e faatalofa atu i lau Afioga i lenei taeao faapea foi le Afioga i le Palemia ma le Kapeneta, Minisita Lagolago ma le la itu le Afioga i le Taitai o le Itu Agai ma le latou itu.

E faatalofa atu foi i Lana Afioga Mamalu, O Le Ao o le Malo ma le Masiofo, Sui o le Fono a Sui Tofia ma le Masiofo, aemaise o le Afaigaluega Paia a le Atua o lo o nofo tatalo aua se manuia o Samoa.

Ia oo atu isi ou itumalo o Sagaga le Usoga le afio Maualaivao, afio le Matua ia Faamausili, afio Sa Maualaivao, afio Seiuli, afio Taito, mamalu o pou e fitu o le fale o le Malietoa ma upu ia te oe Auimatagi. Le paia o le Aiga Sa Gaufaleai, vagana o tulafale, lo oulua toalua Fata ma Maulolo ma le mamalu ia te oe Tuisamau. Afio Saena ma le Aiga Sa Saena, afio Alo o Fuatino, afio Tuitea le mamalu ia Tupailasa ma le fale o le afu Alataua. Malo le soifua maua ma le soifua manuia, faamanuia atu lenei tausaga fou.

Lau Afioga i le Fofoga Fetalai e muamua lava ona momoli atu le faafetai i le Minisita ma le Matagaluega e tusa ai ma le Tala Faaopoopo o le Tupe, ma e lagolagoina foi e lou sui usufono le Tala Faaopoopo o le Tupe.

E faamuamua atu i nai manaoga a lou itumalo. Lau Afioga i le Minisita mo Galuega o lo o tatalo mai si ou nuu o Tuanai e fia faaleleia le latou auala, ma e fia faaauau le auala e tau i Aleisa ma toso atu ai ma le moli e tau foi i Aleisa. E faaleo atu i lau Afioga, masalo na faaleo atu muamua, a o le matou galuega lava o le faamanatu ma tuitui atu.

Ona oo mai lea i le matou nuu o Afega, ua matua faaletonu lava le auala galue o lo o tau atu i Aleisa, masalo foi o le auala lea o lo o i lalo o le tatou Malo o lo o fia faaleleia lau Afioga mo se polokalame o lo o i ai a lo tatou Malo e fia faaleleia le auala lea, faamolemole. E faapea foi ma le auala o lo o agai atu i tai i le tolotolo i Afega.

O nai auala i Malie lau Afioga, faafetai tele lava, e toe momoli ai foi le faafetai i le auala ua maea ona fai, ae o lo o i ai nai auala o lo o fia faatino, na faaleo muamua foi ae manaia foi le toe faaleo, o le auala i Vailoa, o le auala i Vaifoa, o le auala lea e fia sosoo atu i uta e tutusa ma le auala lea sa fai nei i Malie e fia sosoo atu i Nu'u e alu atu i uta i fanua fou o lo o i uta i Nu'u, ma le tatou auala i Vaitoelau i le agai atu i gauta o Afega i le va o Afega ma Malie. O nai manaoga na o lou itumalo lau Afioga e le tele na o auala galue lava e toe fia faamanatu atu.

Lau Afioga i le Fofoga Fetalai a o tau mafaufau nai mataupu e faaoga ai foi le taimi e talanoa atu ai e tusa i mataupu e aoga lautele mo le tatou atunuu. Lau Afioga i le Minisita o le EPC ma le Pulega o le EPC. E matau atu ma le totoa i lenei vaitau ua pau lava le tau o le tatou suauu, masalo pe uma ifo le afa o lenei tausaga e le iloa po o ua \$10 po o ua \$20 i le paelo le paelo lea suauu, ma o se tulaga e faafiafia ai tatou aua o le tulaga lena sa matauina sa taugata ai le tatou paoa. Ia ae o le a se finagalo o le tatou Pulega lau Afioga i le Minisita, pe le i ono aveese ia le tatou surcharge aua o lea ua pau le suauu sa taugata ai a tatou afi kiso o lo o faaogaina nei – ma e talitonu foi i le matau atu i le tulaga o lo o i ai le lalolagi ailoga e toe foi i luga le suauu, o le alu atu lava lea i lalo e le iloa pe tufa fua mai le suauu ia tatou, ua tele le mea, ua sili atu le suauu o lo o maua i Amerika i lo o....

FOFOGA FETALAI: Malie le sui usufono mamalu, se i tuu atu le avanoa i le Afioga i le Minisita, tulai mai lau Afioga i le Minisita mo Galuega, Felauaiga ma Atinae Eeseese.

Afioga Hon Manualesagalala Enokati Posala Lau Afioga i le Fofoga Fetalai, e pau lava sina faasaoga ona ua leva ona leai se surcharge, ua toe i ai fetuunaiga lea o lo o galulue ai lea e i ai le pili i le taimi nei, o le pasene foi lea e faaagaaga mo le suauu, ia o le tulaga lava lena e i ai, a alu i lalo le tau o le suauu ia ua faapena foi ona pau i lalo, a o la e galulue e pei ona ou...ma le vaega a le Pule Faatonu ia le tau e toe faatulaga ai i lenei tausaga mo le isi tolu tausaga, ma le faaaloalo.

FOFOGA FETALAI: Malo. Tulai mai le sui usufono e faaauau le saunoaga.

Afioga MUAGUTUTAGATA FAAMAUSILI AUIMATAGI PETER AH HIM: Faafetai i lau Afioga i le Minisita, ia faafetai pe afai ua aveese le surcharge, ia afai foi o i ai nisi mea i autafa ane o lo o faataugata ai a tatou pili o le moli, faamolemole lau Afioga se i silasila ane i ai ma le mamalu o le tatou Pulega. Pei o se talosaga lena na o nai mataupu sa tilotilo i ai, o le a se mea e mafai ona talanoa atu ai ia tulaga mo le manuia lautele o le tatou atunuu, ae a faapea o lo o galulue i ai le tatou Pulega i lea tulaga, ia faafetai tele i lau Afioga i le Minisita.

Ona ou oo mai lea lau Afioga i le Matagaluega o le Soifua Maloloina, faafetai i le Minisita ma le Pulega. Ua matauina i le TV ua tele ia faalauiloa i tulaga i mea e afua mai ai ia mai eseese, tulaga o le masima faapea foi le suka ma le aua le soona tagofia le pia, ma le tulaga la tau le sikareti, faafetai o lo o...aemaise lava le tulaga lea i le masima. Pau lava sina mea e fia malamalama ai lou sui usufono nei pe fia fautua atu foi i le tatou Malo, o le tulaga o le mea lea o le faalauiloa mai o le pia e ono feoti ai se i tulou ia o tatou tagata pe a soona tagofia, ona uma lea ona faalauiloa mai ia se Ad po o se faalauiloa mai i se inuga o tagata ua aafia i le pia, ae mulimuli ane toe faasau foi ia Ad a le au falepia, le manaia o lou faalogona le manaia o le mea e tupu ia oe pe a inu le vailima pe inu le taula, ia ua fai nei tauvaga i luga o le TV, pe le o feteenai lea. A silasila foi i le tulaga o le sikareti, ua faasa motu lava le sikareti ona toe fai mai se Ad i luga o le TV. Pei o lau matau ua le paleni, o lea ua lapatai mai le sikareti i luga o le pepa sikareti ma faaali mai ata le foliga lelei, le mea e oo ia oe pe a ova lau ulaula sikareti, ae le o faatagaina le kamupani sikareti e fai mai sana Ad manaia i le faalogona e oo ia oe pe a e ula i le sikareti. O le tulaga le paleni lena lau Afioga o lea ou te matauina i luga o...pe a fua mai i Tulafono po o fea e afua mai ai, ae pei e foliga mai e le o paleni ia le mamafa o le faasalaga o lo o ave ia po o le puipuiga o lo o ave i le sikareti ia faapena foi ma le pia. Aua e matau atu, e le iloa pe sili atu le toatele o nai o tatou tagata e aafia i le pia i lo sikareti. Ia pei o se manatu na lau Afioga po o fea o taoto ai le transparent o le Tulafono ina ia faasa sikareti ona advertise i le TV ae faataga le pia, a o la foi e sau ma le Ad e aafia tele le tagata i le pia, faafetai foi i le Ad a le Matagaluega o Leoleo o lo o fautua mai, ia aua ne i soona tago i le pia, ae a sau le Ad foi lele a le auvaega o lo o faia le pia, oka, na o lo ta fia inupia mai lava i le ao e tau i le po.

Lau Afioga pei o nai mataupu na sa avatu ai se manatu, e aoga foi e faatupu manatu. Ae manuia tele lau Afioga i le Fofoga Fetalai, lau Afioga i le Palemia ma le Itu Agai ma lenei Maota, ia manuia le Fono.

FOFOGA FETALAI: Malo saunoa. Ia o lea ua maea le saunoaga a le sui usufono mo Sagaga le Usoga, o lo o ua avanoa le Maota mo se isi sui usufono e fia saunoa.

Tulai maia le sui usufono mo Faasaleleaga Nu. 3, tulai maia e faaii mai saunoaga a lena itu o le Maota.

Tofa TUILEUTU ALAVAA VOI (Faasaleleaga Nu. 3): Faafetai i le avanoa ua maua lau Afioga i le Fofoga Fetalai e faapea foi le paia o lenei aso. O lea ua taoto le fiso ma ona lau aua le faafofoga a le atunuu. Le paia o le Maota i lau Afioga i le Fofoga Fetalai faapea foi le paia o le afio o le Palemia, le Sui Palemia ma le Aiga Minisita, le paia o lena Itu o le Malae ma lena Itu o

le Malu, faapea foi lenei Itu i le afio atu o le Taitai nei, le Sui Taitai faapea foi lenei Vaega Faaupufai o le tatou Maota. O Taitai o Samoa e tasi.

O lenei taeao, e muamua ona ou faatulou atu aua le faafofoga a tupu ma ee, mai ona ao seia oo i ona iu mai Lana Afioga Mamalu O Le Ao o le Malo faapea foi le Sui Ao, le paia o Aiga e fia, Aiga o Tupu, Aiga o Nofo, Aiga o Papa, le Usoga ia te oe Pule ma Tumua, Ituau ma Alataua, Aiga i le Tai ma le Vaa o Fonoti. Ia taoto ia lea itu o le tapuaiga. A o lenei taeao, e muamua foi ona ou faapai i si ou itumalo aua oe le Aiga Taulagi, le Aiga na tau i le Lagi, e taulagi lava ou mea uma, e oo lava i ou maota e taulagi, o ou malaefono e taulagi, o ou tupua taus e taulagi, o au tautalaga i lau tapuaiga paia ma lau tapuaiga mamalu, i le afio o lau Afioga i le Tuiatua Faanofo i lau Afioga Tofa ma lou Aiga, e faapea foi le Susu o lau Susuga Sua o le Maopu o le Taulagi, le afifio o Usoalii faapea foi Alo o Vaafusuaga ma le mamalu ia te oe le Falefitu, ma oe i lenei itu o le Salemuliga tofi, e te afio i Vaiana faapea foi maota e fia e afio ai lau Afioga Vaafusuaga faapea foi le Suafa Tea, le paia o Aiga ma Usoalii na, le falelua ma e na paea le aufono, o le pule a Leuu faapea foi oe le Matua Fetalai, lau fetalai Segi.

Talu ai ona o le pito i Faga, afifio o alii o le Toaono, le Taulagi ia Vaafusuaga ma Toleafoa le paia foi i usoalii taua, tainane le alaafaga aua lo outou toafa ia Pini ma Vaisau, Fiso ma Tapuala ma le tagata o le aava, Salemuliga ma oe le Faleaana, i lenei siu o le Faga. O paia na o le ta itumalo e le toe vaea.

E faapea foi le eetai ma susu ai o le aufaigaluega paia i le susu o lau Susuga i le Toeaina ma le aufaigaluega mamalu, latou te lufilufi latou te faapoipoi latou te amiami se manuia o Samoa, se manuia o le tatou itumalo aemaise o le agaga ma le galuega a le Atua.

O lenei la aso, ua ou tulai tau lava ina ou faapea atu, o le Tala o le Tupe, ua tatau ma onomea ma lelei, e leai foi se tasi e toe aleu, aua o Faigamalo e maseese, se i vagana le tofamamao, vagana le tofa malamalama i le taitaiga a le tatou Malo i ona tulaga aua le atiaeina aemaise o le fefaasoaaina, aemaise o le palepalega ma le... i lea taimi i lea taimi, o lea ua tatou aulia mai. Faafetai ua tatou aulia le tausaga fou, ua tatou faataumuaava, toe tasi lava le gaga tatou laasia le faaiuga o lenei Paeaiaga. E momoli ai le agaga faafetai tele. E ui i lea, a le fatia le sa ma folau, tatou te le iloa le malamalama ma le faamaoni o mea. O lenei ua tatou oo mai i le toe tausaga lenei o le tatou Paeaiaga, e momoli atu le faamalo ma le faafetai i tulaga sa taumafai mai ai i tulaga uma, aua le tatou Malo. Ona faapea ai lea o nai fatuga ma nai fatiga ma nai fautuaga, lau Afioga i le Palemia aemaise foi le Aiga Kapeneta, e fai foi o le nofo i puna, ae fai foi o le tofi i puna ae o le nofo i tuaoa, e pei o lea upu. E le vaivai ai tulaga o le sailiga o le Malo. E ui lava i le tele o mea e fia faaleleia, tele mea e fia avatu ai nai fautuaga aua si o tatou atunuu. O le vaiaso na tea nei na i ai nai faalavelave, le faalavelave na tupu i Savaii, ma ua mataitu pea le tilotilo i aafiaga o le soifuaga ma le soifua le faamaoni i tulaga o faalavelave. O le taavale a le Ofisa o le Vai na aafia ai ma nisi, a ua mataitu foi le tele o mea, aemaise lava Matagaluega lea ou te maitauina, tulouna le faafofoga a Matagaluega ma outou, a le o le EPC, o le Falemai, o le Palama, Ofisa o le Vai ma Leoleo, e tilotilo mamao, o aseta a le Malo. E faapea lau tilotilo, aisea e faapea ai ona fai? O uiga o le soifuaga ua tulai mai nei, ma ua le utuva lea mea i le tulai pea, i lea Paeaiaga ma lea tausaga, e le tulia foi le tele o faalavelave tutupu, a o le fautuaga i Taitai aemaise foi o Ofisa Sili o

Pulega ma Pule Sili, aemaise foi o a outou Afioga i Minisita e fitoitonu i ai lenei mea, e leai, e manumanu le vaai, afai e tauamo si o tatou atunuu, e faapena foi le lagona. A tilotilo foi i nai mea foi o le siitaga o lo o ua i ai nei le taumafai atu, e le tuua le sii, a o le magoto, i lea taimi i lea taimi, o lena ua fua atu le siitaga e le gata o le Falemai, siitaga o... e faapena foi ia mea, i Femalagaaiga ma mea uma lava, e pei ona talanoa atu, e le taofia mea lelei ina ia tatulaga, ta le isi tulaga pipii atu i le isi tulaga.

O le tau o oloa, o le vaiaso na tea nei na \$95 ai le tau o le pusamoa, ae o lona lua mai le gasologa, o mea e faateia ai le vaivai ma le lofia o le tatou atunuu, po o le a foi se fuafuaga i tulaga o le siitaga i lea mea ma lea mea taitasi ua oo mai. E vaai lava ma le agaga pe aisea ua masii ai faapea, aemaise o a outou Afioga i Minisita o lo o feagai ma ia mea, aemaise foi o le siitia o le tau o oloa, ae le tuu ai le tauologologo, leaga e le faamaoni foi le faioloa latou, e pule latou i le tau o a latou oloa, ma e le o malosi foi lea tulaga i le tau ti ti ta ta i taimi uma. O le soifuaga ma le tulaga, e auu lava... i le soifuaga o le tatou atunuu, e lelei mea uma, e leai se agaga. Ae na pau lava lea o le matou tulai atu ma le agaga faaaloalo, e moomia foi e lenei itumalo pei ona momoli atu i le Afioga i le Minisita mo Galuega, o lo o i ai se agaga faapena, e moomia nai auala galue pei ona talosaga atu. O au lenei e feagai ma le nuu i aso uma, e tilotilo, e le fuatasi amea o lenei itumalo, e vaai pea e fia maua e lenei nuu ni auala galue. Faafetai o lea ua muamua le matou auala lea i le lisi o lenei tausaga, e pei o Saipipi ma Saasaai, faafetai tele ua moomia se faaopoopoga. E pei o le auala lea i Salimu lea na faapaia foi po o le 2010 ea, lea na fai e le isi konekarate lea e le lelei, ua tafia uma pei lava o le mea tuai. O le mea lea o le le faamaoni o e togia ma faasolosolo mai ai i si matou nuu i Faga, Luua, Malaefiliga, Sapini, e tatalo atu lava ma le agaga faaaloalo ia alofagia.

O lenei aso, e le mamao foi se matou leo, a o le agaga faamalo i le Tala o le Tupe ua faaopoopo mai, pau le mea ia tatou saunia lenei tausaga i fuafuaga aua le tatou atunuu i lau Afioga i le Taitai faapea foi le Aiga Minisita ma le mamalu tele o le Fono a Samoa i lau Afioga i le Fofoga Fetalai, aua taualumaga o toega o lenei tausaga. Na pau lava le agaga ia molimau se faailoga o se mea. Aua o upu moni, se o le iuleo o le alofa e iloa ai galuega lelei, ioe, a o lenei aso, matou faamalo atu ma faafetai atu, ia liliu maia matagi lelei tatou te folau ai i le toe tausaga lenei o le Paeaiga. O a foi fatia ma tulaga, leai e le uma mea tutupu i lena tausaga ua mavae, tatou ave pea le faamanu ma le faamalo i lo tatou Matai o le o lo o tatou folau ai.

Ia alofagia le mamalu o le Maota, alofagia le tapuaiga a Samoa, ia tatou folau ia i lagima aua lenei tausaga ma ona fuafuaga. O le matou faaopoopo atu lea i le Tala o le Tupe ua tuuina mai, ia manuia le tapuaiga a le tatou atunuu, manuia foi Ofisa Sili o Pulega ma Pule Sili o Matagaluega ma Faalapopotoga a le Malo, manuia le Fono.

FOFOGA FETALAI: Malo faafetai saunoa i le sui usufono mo Faasaleleaga Nu.3. Ia, faafetai i lou sao taua ma fautuaga ua tuuina mai i le tatou Malo e ala i le tatou Tala o le Tupe. Ia, o lo o tele lava le tatou taimi, masalo e maua ai nisi tootoo se toatolu ae tatou te le i malolo i le itula e tasi. O se isi sui usufono e fia saunoa?

Ia, tulai maia oe se tasi o sui usufono matua o lea Itu o le Maota. Tulai mai le sui usufono mo Gagaemauga Nu.2.

Tofa LEVAOPOLO TALATONU (Gagaemauga Nu.2): Faafetai i lau Afioga i le Fofoga Fetalai mo so matou avanoa.

Ou te manatu ua manino tulaga uma i le Tala Faatatau Faaopoopo o lenei Tupe, ma e le o se mea tele foi. E tele foi nai fesili, ae o le a tuuina atu i le taimi e auiliili ai le tatou Tulafono Tau Faaofi ona e faaeteete i le tulaga faalauaitele.

O lenei taimi lau Afioga i le Fofoga Fetalai, a o le i avatua foi ni nai motugaafa a lenei itumalo, e avea foi lenei avanoa e momoli atu ai le faafetai tele i le Minisita mo galuega ona ua amata le auala galue o si o matou nuu i Savaii. Faafetai tele mo le taliaina o le talosaga ma le taimi umi sa tuitui atu ai lenei sui usufono i lenei foi atinae taua mo nuu ma alaafaga. E pei lava ona fai atu sau faamatalaga, e le umi sa matou faamatalaga na o nai mafauauga ma se tuualalo i lau Afioga i le Palemia ma le Faigamalo.

O le tulaga muamua, na matauina lau Afioga i le Fofoga Fetalai i lenei taimi le tulaga o le faaaogaina o tatou vaalele ia mo femalagaiga, pei ua fai foi si umi o tatou sau ai i le vaega lea o le faaaogaina o le Poly Blue ma faiga fou i le faatauina o nofoa, ae pei ua matauina lau Afioga i le Fofoga Fetalai, e fai sina taugata tele o lea vaega . Pe le tatau ona toe tagai ane i ai lau Afioga i le Minisita i lea vaega, aua ua maua faamatalaga, o le route aupito sili lea ona tele ai le polofiti a le Virgin Blue, o le route lea e sau mai Aukilani i Apia. O le tasi la lenei o mafuaaga ua ou toe laga ai lea mataupu se i outou toe silasila ifo i le mataupu lea pe le mafai ona fetuunai, ona e le gata i lenei, ae o lo o penefiti foi na o e faipisinisi ma i latou e gafatia le tulaga o pasese ae faaletonu tatou, aua e mafai e le aufaipisinisi ona plan lana faigamalaga po o le tolu po o le fa vaiaso i luma atu. E le mafai la ona toe suia ona o tulaga foi lea o le manumanu i le faaletonu o le pisinisi, a o tatou ia e faimalaga i le tulaga o maliu ma nisi faalavelave faapena i Niu Sila ma isi atunuu, e leai la se plan faapena. E pei o le ala tonu lenei ua ou fai atu ai, e le o penefiti o tatou tagata i le vaega lea, ae pei e manaia ae toe aumai se tatou vaalele. O lea foi sa ou faalogologo foi, o le mea lea o le Taitai e palaai e fai se mea o le tulaga faapena. Ou te iloa lelei lau Afioga i le Palemia e le o se Taitai palaai, aumai se vaalele e toe faatino ai a tatou femalagaiga, ma toe atiae ai le tatou atunuu.

O lona lua o vaega lau Afioga i le Fofoga Fetalai, sa ou taua foi le mataupu lea i le Minisita o Galuega, i le tulaga lea o le maintenance o tatou auala. Sa ou taua i le taimi lenei, ae, o lea faatoa ou vaai e tofua uma lava kamupani ma latou mea foi nei o compact machine foi nei, sa alu ai i le taimi lenei, o le manaia ia. Pe tasi i le lua masina ua ou le toe vaai i ai, ae ou te iloa tou te matauina sa ou sau i le vaiaso lea na tea nei i le faaitu lea faasolo atu i le afioaga o Malie, e leai lava ma se mea o faia i na mea, na o le laulau lava i lalo, vaeatu le paia o le Maota, tata atu i le suo foi lea, ona uma ai lea i ina. E pei o se aga masani foi lele e masani ai, e fai atu loa i le taimi lenei oso foi, ae tuu se i tau levaleva atu foi ona toe foi lava lea i le mea tuai. Na o ni fautuaga e tuu atu i autafa o lau Afioga. Ae aua o le auala lea e femalagaai mai ai tatou tagata tafafao mai fafo mai le vaalele, e tatau ona fai faalelei.

O le isi mataupu ma o le mataupu mulimuli foi lea lau Afioga i le Fofoga Fetalai, o lea ua agiga i malae le finagalo o le Afioga i le Palemia i le tulaga o a tatou renewable energy lea foi na saunoa i ai le Afioga i le Minisita, ina ia meet le target lea i le 2017. I lau tilotilo atu ile taimi lenei, toe 24 masina, ae tatau lava ona avatu foi lele se fautuaga ma ou faamanatu atu i lau Afioga i le

Minisita, o lea ua ou ui mai i le mea, e fai lava si umi o le process ina o le mea lenei. E lua i le tolu masina e process ai se oka i totonu o le atunuu o Saina mo le materials, ona uma lea o lena, e ono i le valu masina faatoa fau mea o solar motors e fau ai solar panels. O le umi ia o le process lea ou te talatala atu ai, ona uma loa lea o lena, e tasi le vaa i le masina, vaai la i le taimi lea ua alu le tolu masina o lau mai a matou oloa e faatino ai mea ia, e le taitai uma mai, ona o tulaga foi lea e le na o tatou e faaogaina le vaa...

FOFOGA FETALAI: Malie le sui usufono o lo o saunoa se i tuu atu le avanoa i le faauilavea a le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o lea ua ese lau faamatalaga. A o le taimi na faatulai mai ai le mataupu lenei, o folafolaga ia na aumai pei o le emo o le uila le sau o mea nei. A o lea ua ese le faamatalaga ina ua uma ona avatu le...

FOFOGA FETALAI: Tulai mai le sui usufono mamalu.

Tofa LEVAOPOLO TALATONU: Faafetai. Na pau le agaga lea e i ai, o lou alofa atu i lau Afioga ua alu au faaupuga ma au folafolaga i fafo, ae uma ane faapea Taitai o ia atunuu ua e pepelo.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e leai sau folafolaga o alu i fafo, na o iinei lea e alu ai folafolaga ia te outou lea e tou te omai ma outou faamatalaga foi nei e tau mai i le Malo, o le tuai lava ona avatu o le laisene, na ona avatu lava pei o le emo o le uila. A o lea o le a uma foi lenei tausaga o la e le i uma la mea e i le malae vaalele. Toe fia masina uma lau...?

Tofa Lealailepule Rimoni Aiafi: Lau Afioga i le Fofoga Fetalai, o le concern na faaali e le sui usufono mamalu, o le mea lea e atugalua ai lona taofi o le aumaiga o oloa mai fafo i le tasi o le vaa. Ia manatua, o lau fesoasoani i le sui usufono, e eseese ituaiga vaa, o le vaa lea ua sau nei e i ai le faasee apa i tua, e faaopoopo ia lava lana uta e aumai pe a aumai i le isi taimi. Ma le faaloalo lava.

Susuga Hon Tuilaepa Fatialofa Lupesoliai Aiono Neioti Sailele Malielegaoi: E lelei o lea ua ou malamalama, o lea ua ou malamalama atu i le mea lea, na o le pau lava vaa lea e aumai ai mataupu a Levaopolo, ma o lea e tau vaai atu pei e tau faaataata mai foi ni au Saina. E pei e foliga mai na o vaa kalone lava lea e talau mai ai tou mea.

FOFOGA FETALAI: Ia, tulai mai le sui usufono e faaauau le saunoaga.

Tofa LEVAOPOLO TALATONU: Faafetai. O le agaga moni na ala ai ona ou tolaulau atu le piriota umi lea, e fua i ai le gaoioiga a le Palemia i lana folafolaga lea na fai, o lea toe 24 masina, aua e toaono lelei lava kamupani lea ua tuu i ai le faatuatuga o le Afioga i le Palemia, o le isi lima, ua le iloa

po o fea o taamimilo ai, semeamanu faapenei ua uma. A o lea ua ou prove ina atu i le Afioga i le Palemia.....

FOFOGA FETALAI: Malie lau Afioga i le sui usufono mo Gagaemauga Nu.2, se i tuu atu le avanoa se i tali mai le Minisita mo Galuega.

Afioga Hon Manualesagalala Enokati Posala: Na pau le vaega lea na prove nei e Niu Sila i le latou solar lea na faatino, e fa masina na fai ai le 2.2 megawatt, o lona uiga la e le tatau ona i ai se taamilosaga umi tele e tatau ona fua pe a fua i le faatinoga o le galuega lea. O le faataatiaga lea o lea e tatau ona agai i ai tatou vaega uma ia na saina power purchase agreement e tatau ona faatino ai galuega. Ae vagana ona o faafitauli ia e tulai mai,pei e agai muamua mai fai ona toe o lea e tausaili ni mea e fai ai galuega. Ae a fai lava e faatino agai i tatou maliega ia na faatino, o lona uiga o le tulaga lena e i ai, o lea foi ua i ai le taimi faatulagaina e mafai ona faatino ai vaega ia.

FOFOGA FETALAI: Tulai mai le faauilavea a le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e 14 le aofai o kamupani ia e folafola mai mea ia, a o le 14 lea, o lea e tau taofiofi atu foi lele aua o lea e manao uma latou e mafai lava e le toatasi ona fai uma lava ituaiga tele o le eletise lea e moomia e Samoa. O le mea la lea e taumafai i ai le Minisita ma le Vaega lea o lo o vaia mea tau eletise, e faasoosoa i le 14 lea ia pau mai nisi ae o la e omai le isi vaega, a o le toatele lava la o kamupani nei mai Saina lea e behind ai i le tele o mea ia. O lea la e vaavaai atu, o lea ua televave lava le alu o mea ia ua faatino nei, a o lea faatoa ou tei ina ua ou faalogo atu, afai loa e tuai lau kamupani, o le a fai ia Palu e alu loa e aumai ni ana ia foi Saina.

Afioga Hon Palusalua Faapo II: Lau Afioga i le Fofoga Fetalai o se mea e....

FOFOGA FETALAI: Se ou te ofo i lou amanaia o lea tulaga.

Afioga Hon Palusalua Faapo II: Leai o lea ou te fesili i le sui usufono o lea e saunoa nei.

FOFOGA FETALAI: Tulai mai le Taitai o le Itu Agai.

Afioga Hon Palusalua Faapo II: O lea ua ou vaai atu nei, a leai se isi o lenei Itu, e le faagaioia mea ia. O le ala foi lena o lea ou te tulai atu ai. O sui o le Tautua, e naunau ia fai le eletise mo le atunuu, aua a le faia e le Tautua, e le vave.

FOFOGA FETALAI: Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le mea e fia faasao, o le tama lea o Le va o.... e uso lelei lava ma le tama lea o Muagutu. O laua la e ana le kamupani lea. O le mea lena o lea ou te fai atu ai, aua o latou nei sa i tua lava

sa fai a latou pisinisi, o tagata faipisinisi lelei tele. O le mea lena ou te fai atu ai, a tuai mai lua kamupani nei mai Saina, na pau lava le mea e vave ai, o le a ou fautuaina loa Palu e alu foi ia e aumai sana kamupani aua o le isi foi faipisinisi maoae lea, lea e le o faaalua i luma.

FOFOGA FETALAI: Tulai mai le sui usufono e faaauau le saunoaga. Ia, malie ia le sui usufono se i tulai mai Muagututagata.

Afioga Muagututagata Faamausili Auimatagi Peter Ah Him: Mo le faasaoina o le saunoaga a le Afioga i le Palemia, e leai ua leva lava ona leai ni au Saina. O le faasaoga lena, faafetai tele.

FOFOGA FETALAI: O ai ua avea au Saina Muagutu?

Afioga Muagututagata Faamausili Auimatagi Peter Ah Him: O Saina ia e uma ane lava ua toe tafefea Saina.

FOFOGA FETALAI: Ia tulai mai le sui usufono mo Saleaula e faaauau le saunoaga.

Tofa LEVAOPOLO TALATONU: Faafetai. E leai e le o se isi lava itu na avatu ai sau faamatalaga, o lea ua maua tonu mai lava e le Afioga i le Palemia le tulaga lea e tau avatu. O le mea moni lava, o lea e taofi e le isi lima kamupani lea le avanoa, a o le tele ia o nai isi kamupani lea e fia omai e fai so latou sao ma tufatufa atu foi i ai tulaga uma ia. O le tulaga lea sa taua e le Afioga i le Minisita e fa masina, e sao lelei, e fa masina e fai ai le installation, e fa i le ono. A o isi masina ia ou te tauina atu i le faiga o le processing, e fai lava sina umi. Ma o le agaga atoa, o le taumafai e fai loa se gaoioiga foi lea faavavevave ia oo atu i le 2017 ua meet e tatou le mea lea tatou te tilotilo i ai.

O le isi vaega, sa ou matamata i le Scale System a le EPC lea e i Fuluasou, ou te iloa a e agai i ai lau Afioga i le Minisita ona e talitonu lea i lau faamatalaga lea e fai atu, o lena e monitor i ina le 2.2 megawatts lea na fai e Niu Sila. Sa ou alu atu i ai i le vaiaso lea na tea nei toeitiiti lava ta le 12.00, na la mai lava i le 7.00 i le taeao toeitiiti lava ta le 12.00, toeitiiti lava le maua se megawatt se tasi. O le isi lena vaega e tau ina avatu sau fautuaga i le silasila i kamupani lea e omai e fai tatou solar system, ia mautinoa latou te aumaia le solar panel, e talafeauga, the best quality. E mafua ona ou fai atu i le vaega lea, ona o le tele ia o le sao o le tatou Malo ma le tatou atunuu lea e fesoasoani ai i mea ia. O mea ia ina ia mautinoa e talafeagai le tatou fesoasoani ma faaoga lelei le tatou fesoasoani i atinae. Aua o lea tatou te totogia, e leai se tiute, o mea uma na, o le totogia o lisi e fai ai, o lea ua ou faamanatu atu i lau Afioga i le Minisita, se i silasila e tele lava le tatou sao ma tupe ia e fesoasoani ai. Ae ua tau mai lava i le mea lea na ou talanoa atu ai, e 2 megawatt le mea atoa na fai ae read mai e le EPC, e le atoa se megawatt ae ua ta le 12.00 i le aoauli. A mei atu foi i luga na o le 1.2, 1.3, e le o aumaia atoa e le solar panel le 2 megawatts. O le faaletonu la lena i le mea na aumai e le panel. O si au faapoopo atu lena e soso atu i le tulaga o tatou atinae. Ou te iloa na o le pau lea o se lauga a lenei itumalo, e momoli atu le agaga faafetai i lau Afioga i le Fofoga Fetalai, manuia foi le Palemene i lenei aso.

FOFOGA FETALAI: Malo faafetai saunoa i le sui usufono mo Gagaemauga Nu. 2 mo lou sao taua i le tatou Tala o le Tupe i lenei vaega o le aso. Ia o le a muliai tuleiga ma saunoaga o lenei aso i le sui usufono mo Palauli, tulai mai le sui usufono.

Afioga AFOAFOUVALE JOHN MOORS (Palauli): E faatulou atu i Lana Afioga Mamalu, O Le Ao o le Malo faapea foi le Sui o le Fono a Sui Tofia, lau Afioga i le Faamasino Sili ma le vasega o alii Faamasino o le Faamasinoga, aemaise le faafogafogaaga a lo tatou atunuu pele o Samoa.

Ou te faafeiloai atu foi i lau Afioga i le Fofoga Fetalai, aemaise lau Afioga i le Taitai o le Malo lau Afioga i le Palemia, ae a sui usufono uma o le Maota nei. O outou paia o le a faataalolo ia, ae taatia atu i mauga sa, ona e leai lava se vave e na te toe sailiili pe sagolegole o paia lava e tumau seia oo i le faavavau, tulou.

Ae tau lava ina ou faapai atu isi ou itumalo pele o lo o faapea ona faafogaga mai i le Fonousu a Samoa, i le afio o Faasisina faapea foi Sa Lilomaiava, alaatai Sa Faleletaua na potopoto, aua Palauli ma lona Itu o Pule. E le faagaloina la outou tapuaiga o Faafeagaiga Taulagi o lo o faapea ona faanonomanu isi o matou itumalo, aua le tauasuina o le Upu o le Ola, faafetai mo a outou talosaga faifaipea. E talitonu le agaga, o le ala lea ua ala ai ona manuia le usugafono a Palauli.

Ou te faafetai atu i le Afioga i le Minisita po o le Afioga foi i le Palemia ma le Matagaluega e tusa foi ma lenei Tulafono Tau Faaofi, ia o lenei ua maea ona agiga foi i le Maota nei e tele galuega o lo o faapea ona moomoo i ai le Malo aua le faaalualu i luma o le Faigamalo aemaise e manuia ai tagatanuu o le tatou atunuu, peitai ane, e utiuti le seleni. E i ai le talitonuga, o le a faapea ona ulimasao le faamoemoega o lo o faapea ona faataatitia mai totonu o le tatou Tala o le Tupe o lenei tausaga se i oo atu ia Iuni o le ogatotonu o le tausaga nei.

E fia faaali foi le agaga faafetai o lenei sui usufono i le Malo tele o Iapani ma ona tagatanuu. O lea ua maea nei ona taatia atu i le Ofisa o le Amepasa o Iapani se talosaga a lenei itumalo aua se faleaoga, ona o lea ua suia foi faiga sa faapea ona faataatitia e le Malo aua ia ituaiga polokalame faapea, o lea na ala ai ona uia loa le Ofisa o le Amepasa o Iapani, ma ua faapea ona maea ona tuuina atu faamaumauga uma o lo o faapea ona finagalo i ai latou – ma o lo o talia nei se tala, e le taumate o se tala fiafia.

Ona ou toe fia laga ai lea o se talosaga faapea ona mavae ona taatia atu i le Matagaluega o Aoga, ona o se malae taalo isi o matou nuu pe a ma le lua tausaga nei talu ona tuuina atu se talosaga e toe asia ai lea talosaga, e valuvalusia ai aa o le fau i lau Afioga i le Minisita, o le a sau silasila i ai i se taimi talafeagai. E le gata i lea o le Afioga i le Minisita mo Galuega, Felauaiga ma Atinae Eseeese i le talosaga sa faapea ona tuuina atu, se i silasila ane i auala galue, ua leva ona i ai auala galue o lou nuu i Vaitoomuli, ae toe lava ina faata ona ua fai sina leva ona le toe faataina pe toe teuteuina, ia o le ala lea ua toe valuvalusia ai aa o le fau i lau Afioga i le Minisita, pe le i ai se finagalo e toe asia ia ma toe tuutuu laitiiti atu i uta. Ae a foi le auala galue o lo o faapea ona faaaogaina e le Malo i lo matou nuu i Vailoa, e i ai taimi e faaletonu ai lea auala, ae pei ona toe faataina ma faaleleia aua foi le auunaga a le Pulega o le Suavai o lo o faapena ona faaoga atu e uia ai auala ina ia mafai ona oo atu i Aseta a le Malo o lo o faataatitia i tuafale.

A o le i faamuta se tala, ia e ao lava ona ou faapai atu i lau Afioga Leituala ona ua lagia foi le maota i puloulou aua le tuua o le malo i le Aloalii ia Tupua, faamaise atu le agaga o le Alii i lo tatou aiga aua le feagai ai ma lea faamoemoe.

Lau Afioga i le Fofoga Fetalai, e pau lea o se tala a Palauli, ia manuia lau Afioga, ia manuia sui usufono uma o le Fono, faafetai.

FOFOGA FETALAI: Ia malo saunoa i le sui usufono mamalu, e manatu o lea ua...le faafofogaaga a lo tatou Maota, o lo o i ai pea le tatou lima minute, e lelei foi le faaiu maea i le aso ae tatala maea a taeao.

Ia tulai maia se tasi o sui usufono mamalu o le Palota Taitoatasi lau Afioga Maualaivao Pat Ah Him, tulai maia e faaiuiu maia le saunoaga ia ma saunia maia e oe se tatou tatalo e faaiu ai le tatou Fono.

Afioga MAUALAIVAO PAT AH HIM (Palota Taitoatasi): Faafetai i lau Afioga i le Fofoga Fetalai mo le avanoa, ou te talitonu lava o lea e fetai lava minute ia e totoe ma si ou manatu laitiiti lea e fia momoli atu.

Ae muamua ona faafetai atu i le tapuaiga mamalu a Lana Afioga Mamalu, O Le Ao o le Malo aemaise foi o le tatou atunuu o lo o faafogafoga mai i le Fonousu a Samoa. Ma o lenei foi itula e talitonu lava e manaia le felafolafoaiga i lenei taeao i lau faalogologo, e tele lava ina, o si au tamai tala lea ona faatoa fai ai lea o lou manatu, o lau faalogologo ia o Saina, o Saina o Saina lava lea ua lau mai foi e aumai foi e le la vaega ia ma nisi e toatele. Ia sa fesili mai le Amepasa o Saina ia te au, o le a le mea e tau soo ai le suafa lea o Saina iinei i le Maota? Ona ou fai atu lea i ai, malie lau Afioga e le o se mea leaga, ae taua ia ona o le tele o le sao o le Malo o Saina ia Samoa lea e ala ai ona...ua lauiloa ma... ia ae saunoa mai le Amepasa, ae o le a ea le mea e fai ma fasi soo ai nai isi Saina i le matou faalogologo atu? Ona ou fai atu lea i ai, e ala ona tupu le mea lena o le galue o le Saina faasoloatoa ae le malolo, ia fai mai lea, oi sole, ia lea la o le a ou fautua i ai e fai ma malolo, ona e fiu lava e tatai atu i galuega e le fia malolo nei ituaiga tagata.

Ae ui i lea lau Afioga i le Fofoga Fetalai, e faamalo atu faafetai i lenei aso i le tatou Fono. O le mea muamua ou te faafetai atu i le Minisita mo Leoleo ma Falepuipui, ona o le mea e faafetai ai e tasi lava le agaga. I le matou faalogologo ma le matou matau i lenei vaitau i le Matagaluega, o lona taua, ua agai so o se amio po o se aga a se malu o le Malo po o se alii leoleo e talafeagai pe e le talafeagai foi, ua matou matauina pea le sailiili ma suesue ina ia maua le sao ma le tonu. E lagona ai foi la e le atunuu ma i matou nei le fiafia aua e lagona ai le secure o le taua o le puipuiga ma le saogalemu o le tatou atunuu e le o malamalama tele i mea tau Tulafono, ae faafetai mo galuega lelei aemaise foi o galuega e tele i luga o le auala o lo o feagai ma tatou malu o le tatou Malo. E i ai foi faafitauli e vili ai pea i matou nei e tusa ai ma ni mea o tutupu, ia e vave lava ona oo mai le fesoasoani ma le auaunaga, e faafetai ai i le Afioga i le Minisita i le tulaga lea.

E faapea foi ona matou faafetai atu i le Afioga i le Minisita mo Galuega, Felauaiga ma Atinae Esee i le tele o auala ma galuega lelei ua faatinoina i le matou matau, e moni lava e i ai foi nai isi lau Afioga i le Minisita, ia o lo o totoe lava nai galuega o auala i lo matou itumalo, e talosaga atu pea ina ia faaleleia. E le tagisa, ae na ona tuutuu atu pea i ou tafatafa i lau faaso, e i ai le nuu lea o Alamagoto, o lo o i ai auala masalo e silafia e lau Afioga, faapea

foi Vaitoloa aemaise le auala lea e i le pito mai agai i tafatafa o le pamu penisini, o Aleisa e faapena foi ma Moamoa, aemaise lava ia i i Palisi, ua matou matauina le le saogalemu, semeamanu le faaeteete o avetaavale i le agai atu lea i luga ma le sau i lalo i le vaapiapi o auala toe le lelei autafa e alo i ai ia taavale.

Ua matou soso atu i lau Afioga i le Minisita mo Punaoa Faanatura ma le Siosiomaga, e faamalo i taligalu. E i ai lava sina tamai pitonuu lea i Vailele i gatai i le fasi fanua lea e i gatai o Taupousa i le Mapuifagalele, o se vaega eleele o le tatou atunuu o lo o nofoia nei e nisi o faifeau. Ua matou matau ua pei o lea e misi i le faasoa le fasimea lea ma matau atu, ua toetoe lava oo mai i le auala o lo o agai atu lava i ina i le mea o lo o i ai ia maota o faifeau i le aia i le sami, e le gata i le solo i le mea maualuga lea e i ai ia le maota o Taupousa ma Mapuifagalele i Tama ma Tina matutua, a o lalo lava i le mea lea i le ogasami lea, ou te talitonu e mafai ona e silasila i ai lau Afioga i le Minisita ina ia mafai ona faaleleia. O se vaega o le taulaga ma o se vaega foi na ona matou tuualalo atu ma faamanatu atu.

Ou te faafetai foi i le Afioga i le Minisita mo Aoga, Taaloga ma Aganuu, ua maua le faamalamalamaga lelei lava lea, e ala ona ou faafetai i ai, o le faiga o lo o fai ai ia aoga i nuu i tua faapea foi Apia, ua le faapito manu ia Tasi i le Kolisi o Samoa ma Avele, ae ua matou talitonu, o le ola faatasi o fanau aoga i le malosi o mafaufau ma le vaivai o mafaufau, e faapena ona motivate faatasi ai ia...e lelei faatasi ai ia le aoga, aemaise lava ia students, o le taua lena ia te au, e le o faapitoa e moni le saunoaga i le mea lea sa e saunoa ma e taua o le discrimination, o le mea lena o lo o taumafai pea tatou aua ne i ofi mai, a o lea la ua manaia i le matou faalogologo atu, faafetai faamalo i le tulaga lea.

Ou te faafetai foi i le tatou Malo e tusa ai ma fuafuaga o le tatou malae vaalele, masalo ua ou lauga soo tele i le malae vaalele, ona o le atinae lea o tagata tafafao maimoa mai fafo, e ese le malosi, a o le taimi lena e le o atoatoa le malosi a o le taua ia isi o tatou Malo, o le malae vaalele o i e ulufale uma mai i ai tagata tafafao maimoa mai, ioe, e tatou te le faalagolago foi la i le faatoatele o tatou aiga fuafuaina, aisea? Tatou te faalagolago i le tele mai o tagata tafafao maimoa mai, o le fofa lena o le moomia e lo tatou Malo i ni seleni se tele ina ia mafai ai ona atinae lo tatou atunuu.

FOFOGA FETALAI: Ou te vaelupeina le saunoaga a le sui usufono mamalu, ona o lea ua tatou taunuu tonu i le tatou taimi malolo, e avatu le agaga faafetai i le sui usufono o lo o saunoa nei ma e i ai le faamoemoe o le a faaauuina lau saunoaga i le aso a taeao.

Ua faamauina o lea ua sefulutasi sui usufono ua maea ona saunoa i lena aso, ma o se tulaga e momoli atu ai le faafetai tele a le Nofoa i le paia ma le mamalu o sui usufono uma o le tatou Maota ua maea ona fetalai ma tulei saunoa i lena aso, faafetai i lo outou lavapapale aemaise o lo outou lagolagosua e ala i le tatou galuega. E i ai le agaga ma le faamoemoe o le a tulimatai lo tatou faamoemoe i le aso a taeao, ona faatu ai lea o le lafo e pei lava o tulaga masani.

A o lena taimi, e momoli atu le faafetai ma le faamalo i tulaga aloaia, malo le onosai malo le usufono ua malo foi le tapuai mai i nisi o sui usufono mamalu o lo o olioli mai e saunoa i se taimi o le aso a taeao.

E faapai atu foi i le tapuaiga a Samoa i ona tulaga faalupelupe, faafetai mo le tapuaiga i lena aso. E i ai le faamoemoe o le a vavae foe o lena aso, tatou

sailiili malosi mo le Aso Fono a taeao. O le talitonuga o le a ave i ai lo outou soifua manuia.

E faapea foi le tapuaiga a tupu ma ee, o tamalii ma failauga i Faauluuluga e le gata o Faalapotopotoga a le Malo aemaise o Kamupani eseese ua tatou mafuta i lenei aso ona o le tatou Tala Faatatau Faaopoopo (Nu.1) o le Tupe 2014/2015.

Ia tulai maia lau Afioga i se tasi o sui usufono mo le Palota Taitoatasi, Afioga Maualaivao Pat Ah Him e fai se tatou tatalo faaiu e faamaea ai le tatou Fonotaga i lenei aso.

Na motusia Felafolafoaiga ina ua tolopo Taulumaga a le Fono Aoao i le itula e 1:04 i le aoauli seia aulia le itula e 9:00 i le taeao o le Aso Lulu, 21 Ianuari 2015.